

摘藻堂四庫全書薈要

史部

欽定四庫全書薈要卷六千四百一史部

元史卷二十二

明翰林學士亞中大夫知制誥兼修國史宋濂等修

本紀第二十二

武宗一

武宗仁惠宣孝皇帝諱哈尚順宗達爾瑪巴拉之長子也母曰興聖皇太后鴻吉哩氏至元十八年七月十九日生成宗大德三年以寧遠王庫庫楚總兵北邊急於

備禦命帝即軍中代之四年八月與海都軍戰于呼巴  
哩之地敗之十二月軍至阿勒台山奈曼岱部降五年  
八月朔與海都戰於塔奇克拉呼地海都軍潰越二日海  
都悉合其衆以來大戰于哈喇哈達之地師失利親出  
陣力戰大敗之盡獲其輜重悉援諸王駙馬衆軍以出  
明日復戰軍少却海都乘之帝揮軍力戰突出敵陣後  
全軍而還海都不得志去斃死八年十月封帝懷寧王  
賜金印置王傅官食瑞州六萬五千戶十年七月自托

果斯圈地踰阿勒台山追叛王烏魯斯獲其妻孥輜重  
執叛王伊蘓托噶等及駙馬巴延八月至雅爾達實之  
地受諸降王圖們莽賚特穆爾鄂爾和等降海都子徹  
伯爾逃于都勒幹部盡俘其家屬營帳駐冬阿勒台山  
降王圖沙瑪復叛與戰敗之北邊悉平十一年春聞成  
宗崩三月自阿勒台山至和琳諸王勲戚畢會皆曰今  
阿南達莽賚特穆爾等熒惑中宮潛有異議諸王伊奇  
哩昔嘗與叛王通今亦預謀既辭服伏誅乃因闔辭勸

進帝謝曰吾母吾弟在大都俟宗親畢會議之先是成宗違豫日久政出中宮命仁宗與皇太后出居懷州至是仁宗聞訃以二月辛亥與太后俱至京師安西王阿南達與諸王莽賚特穆爾於正月庚午先至左丞相阿固岱平章巴特瑪琳沁前中書平章巴延中政院使竒味道興等潛謀推成宗皇后巴約特氏稱制阿南達輔之仁宗以右丞相哈喇哈斯之謀言於太后曰太祖創業艱難今大行晏駕德壽已薨諸王皆疎屬而懷寧王

在朔方此輩潛有異圖變在朝夕俟懷寧王至恐亂生  
不測不若先事而發遂定計誅阿固岱奇味等而遣使  
迎帝五月至上都乙丑仁宗侍太后来會左右部諸王  
畢至會議乃廢皇后巴約特氏出居東安州賜死執安  
西王阿南達諸王莽賚特穆爾至上都亦皆賜死甲申  
皇帝即位於上都受諸王文武百官朝於大安閣大赦  
天下詔曰昔我太祖皇帝以武功定天下世祖皇帝以  
文德洽海內列聖相承丕衍無疆之祚朕自先朝肅將

天威撫軍朔方殆將十年親御甲冑力戰却敵者屢矣  
方諸藩內附邊事以寧遽聞宮車晏駕迺有宗室諸王  
貴戚元勳相與定策和琳咸以朕為世祖曾孫之嫡裕  
宗正派之傳以功以賢宜膺大寶朕謙讓未遑至於再  
三還至上都宗親大臣復請於朕問者姦臣乘隙謀為  
不軌賴祖宗之靈母弟阿裕爾巴里巴特喇稟命太后  
恭行天罰內難既平神器不可久虛宗祧不可乏祀合  
辭勸進誠意益堅朕勉徇輿情於五月二十一日即皇

帝位任大守重若涉淵冰屬嗣服之云初其與民更始可大赦天下存恤征戍軍士及供給繁重州郡免上都大都隆興差稅三年其餘路分量重輕優免雲南八番田楊地面免差發一年其積年逋欠者蠲之逃移復業者免三年被災之處山場湖泊課程權且停罷聽貧民採取站赤消乏者優之經過軍馬勿得擾民諸處鐵冶許諸人煽辦勉勵學校蠲儒戶差役存問鰥寡孤獨是日追尊皇考曰皇帝尊太母元妃曰皇太后丁亥陞通政院



秩正二品陞儀鳳司為玉宸樂院秩從二品壬辰加知

樞密院事托多爾海太傅中書右丞相哈喇哈斯達爾

罕太保並錄軍國重事知樞密院事塔喇海為中書左

丞相預樞密宣徽院事同知徽政院事綽和爾伊克扎

爾古齊阿實克布哈江浙行省平章政事莽賚布哈並

為中書平章政事江浙行省左丞劉正為中書左丞達

授中書左丞奇徹福建道宣慰使額森特穆爾並為中

書叅知政事中書右丞行御史中丞塔斯布哈為御史

大夫平章政事綽和爾為知樞密院事特授竒塔特布  
濟克中書平章政事延慶使綽爾齊中書右丞同知  
和琳等處宣慰司事塔海中書右丞阿里中書左丞托  
克托御史大夫以大都迤北六十二驛驛戶罷乏給鈔  
賙之封皇太子乳母李氏為壽國夫人其夫延嘉努為  
壽國公以平章政事哈克織為遼陽行省平章政事建  
州大雨雹真定河間順德保定等郡蝗六月癸巳朔立  
母弟阿裕爾巴里巴特喇為皇太子受金寶陞武備寺

為武備院秩從二品甲午建行宮于翁果察圖之地立  
宮闕為中都丁酉中書右丞相哈喇哈斯達爾罕左丞  
相塔喇海言臣等與翰林集賢太常老臣集議皇帝嗣  
登寶位詔追尊皇考為皇帝皇考大行皇帝同母兄也  
大行皇帝祔廟之禮尚未舉行二帝神主依兄弟次序  
祔廟為宜今擬請諡皇考昭聖衍孝皇帝廟號順宗大  
行皇帝曰欽明廣孝皇帝廟號成宗太祖之室居中睿  
宗西第一室世祖西第二室裕宗西第三室順宗東第

一室成宗東第二室先元妃鴻吉哩氏實哩達喇宜諡  
曰貞慈靜懿皇后祔成宗廟室制曰可又言前奉旨命  
臣等議諸王朝會賜與臣等議憲宗世祖登寶位時賞  
賜有數成宗即位承世祖府庫充富比先例賜金五十  
兩者增至二百五十兩銀五十兩者增至百五十兩有  
旨其遵成宗所賜之數賜之戊戌哈喇哈斯達爾罕言  
比者諸王駙馬會于和琳已蒙賜者今不宜再賜帝曰  
和琳之會國事方殷已賜者其再賜之己亥御史大夫

托克托翰林學士承旨三寶努言舊制皇太子官屬省

臺參用請以羅羅斯宣慰使烏魯斯任之中書詔以為

中書右丞班朝諸司聽皇太子各置一人以拱衛直都

指揮使茂穆蘓角觚屢勝遙授平章政事壬寅塔喇海

加太保錄軍國重事太子太師癸卯置詹事院甲辰樞

密院請以軍二千五百人繕治上都鷹坊及諸官廨有

旨自今非奉旨軍勿輒役以平章政事行和琳等處宣

慰使都元帥哈喇格爾通政使武備卿特穆爾布哈並

知樞密院事乙巳以金二千七百五十兩銀十二萬九千二百兩鈔萬錠幣帛二萬二千二百八十匹奉興聖宮賜皇太子亦如之中書省臣言中書宰臣十四員御史大夫四員前制所無詔與翰林集賢諸老臣議擬以聞丙午太陰犯南斗杓星嶽政使奎騰等言拜布哈以私錢建寺為國祝釐其父為諸王斡罕所害請賜以斡罕所得歲賜命以五年與之為銀四千一百餘兩絲三萬一千二百九千斤織幣金百兩絹七百一十匹戊申

特授尚乘卿布呼齊綽和爾並平章政事大同七年儲軍  
民總管府達嚕噶齊克爾格木騰中書右丞辛亥以中  
書平章政事托克托為江西行省平章政事壬子封皇  
妹僧格喇實為魯國大長公主駙馬多阿克巴拉為魯  
王特穆爾布哈喇格爾等言舊制樞密院銓調軍官公  
議以聞今近侍自擇名分從內降旨壞世祖定制且誤  
國事在成宗時嘗有旨輒奏樞密事者許本院再陳臣  
等以為自今用人宜一遵世祖成憲帝曰其遵前制餘

人勿輒有請又言軍官與民官不同父子兄弟許其相襲此世祖定制比近侍有輒以萬戶千戶之職請於上者內降聖旨臣等未敢奉行帝曰其依例行之甲寅敕內郡江南高麗四川雲南諸寺僧誦藏經為三宮祈福乙卯遣伊克扎爾古齊瑪喇勒赴北軍以印給之甲寅御史大夫塔斯布哈言殿中司所職中書而下奏事者必使隨之以入不在奏事之列者聽其引退班朝百官朝會失儀者得糾劾病故者必以告請如舊制又言舊



制內外風憲官有所彈劾諸人勿預而近有受贓為監察御史所劾者獄具黃緣奏請託言事入覲以避其罪臣等以為今後有罪者勿聽至京待其對辯事竟果有所言方許奏陳皆從之塔斯布哈又言皇太子有旨有司贓罪不須刑部定議受敕者從廉訪司處決省臺遣人檢覈廉訪司文案私意沮格非便平章阿實克布哈因言此省臺同議之事臺臣不宜獨奏帝曰此臺臣事阿實克布哈勿妄言臺臣言是如所奏行之塔斯布哈

托克托並遙授左丞相戊午進封高麗王王昨為瀋陽  
王加太子太傅駙馬都尉置皇太子家令司府正司延  
慶司典寶署典膳署己未封寧遠王庫庫楚為寧王賜  
金印庚申遙授左丞相行御史大夫塔斯布哈右丞相  
辛酉汴梁南陽歸德江西湖廣水保定屬縣蝗秋七月  
癸亥朔封諸王圖喇為越王諸王徹伯爾言瓜州沙州  
屯田通戶漸成丁者乞拘隸所部省臣言瓜州雖諸王  
分地其民役於驛傳徹伯爾言宜勿從陞章佩監為章

佩院秩從二品賜喇特納巴拉鈔萬錠甲子命御史臺

大夫特古勒德爾知樞密院事塔爾古岱中書平章政

事綽和爾以即位告謝南郊丙寅以禮店蒙古萬戶屬

土番宣慰司非便命仍隸圖沙瑪宣慰司防守陝州諸

王駙馬入覲者非奉旨不許給驛以中書叅知政事趙

仁榮為太子詹事以阿保功授明埒克大司徒封其妻

梅仙為順國夫人賜綽和爾軍士鈔六萬錠幣帛二萬

匹遣丕勒雅爾邁達哩達克丹詣西域取佛鉢舍利不

勒雅爾邁達哩遙授宣政使達克丹遙授平章政事以  
並命太傅右丞相哈喇哈斯達爾罕太保左丞相塔喇  
海綜理中書庶務詔諭中外己巳太陰犯亢置宮師府  
設太子太師少師太傅少傅太保少保賓客左右諭德  
贊善庶子洗馬率更令丞司經令丞中允文學通事舍  
人校書正字等官壬申命御史大夫特古勒德爾中書平  
章政事綽和爾樞密副使布呀齊以即位祇謝太廟以安  
西平江吉州三路為皇太子分地越州路為越王圖喇

分地賜諸王班布爾實鈔萬錠癸酉罷和琳宣慰司置

行中書省及青海等處宣慰司都元帥府和琳總管府

以太師伊徹察喇為和琳行省右丞相中書右丞相哈

喇哈斯達爾罕為和琳行省左丞相依前太傅錄軍國

重事江浙水民饑賑糧三月酒醋門攤課程悉免一年

乙亥以永平路為皇妹魯國長公主分地租賦及土產

悉賜之賜越王圖喇鈔萬錠諸王溫都遜布哈所部三

萬五千二百二十錠丙子以江浙行省平章政事塔斯

哈雅知樞密院事綽和爾並為中書平章政事丁丑封  
諸王班布爾實為齊王圖烈納為濟王德勒格爾布哈  
為北寧王太師伊徹察喇為洪陽王加平章政事托克  
托太尉以中書左丞相塔喇海為中書右丞相監修國  
史御史大夫塔斯布哈為左丞相江浙行省平章政事  
嘉琿河南江北行省平章政事帕哈哩鼎並為中書平  
章政事平章政事特們德爾為江西行省平章政事戊  
寅以儀鳳司大使和斯哈雅特穆爾布哈坊司達嚕噶

齊實迪並遙授平章政事為玉宸樂院使己卯以集賢院使拜布哈為中書平章政事七月庚辰以御史中丞濟爾噶朗為御史大夫辛巳加封至聖文宣王為大成至聖文宣王右丞相塔喇海左丞相塔斯布哈言中書庶務同僚一二近侍往往不俟公議即上聞非便今後事無大小請共議後奏帝曰卿等言是自今庶政非公議者勿奏置行工部於翁果察圖以遙授左丞相同知樞密院事額爾吉納知樞密院事御史中丞王壽江浙

行省左丞郝天挺並為中書左丞壬午熒惑犯南斗命

御史大夫特古勒德爾知樞密院事塔爾古岱中書平章

政事綽和爾以即位告社稷癸未陞利用監為利用院

秩從二品甲申遣沙木斯鼎使西域遙授福建道宣慰

使乙酉賜壽寧公主鈔萬錠丙戌以內郡歲歉令諸王

衛士還大都者揀汰以入從和琳省臣請乞如甘肅省

例給鈔二千錠歲收子錢以佐供給仍以網罟賜貧民

御史大夫阿爾婁言舊制中書省樞密院御史臺宣政



院許得自選其人他司悉從中書銓擇近臣不得輒奏  
如此則紀綱不紊帝嘉納之以同知宣徽院事巴勒達  
實為中書左丞中書叅知政事竒徹為四川行省左丞  
浙江湖廣江西屬郡饑詔行省發粟賑之丁亥使鄂勒  
哲偕竒爾台鄂諾往徵竒爾濟蘇部圖魯格駝馬鷹鷄  
山東河北蒙古軍告饑遣官賑之賜晉王部貧民鈔五  
萬錠己丑塔喇海塔斯布哈言前納延叛其繫虜之人  
奉世祖旨俱隸版籍比者近臣請以歸之諸王托克托

彼即遣人拘括臣等以為此事具有先制今已歸托克  
托所部宜令遼陽省臣色徹肯等往諭已拘者悉還其  
主從之安西等郡旱饑以糧二萬八千石賑之庚寅置  
延福司秩正三品辛卯詔唐古圖魯格戶籍已定其入  
諸王駙馬各部避役之人及冒匿者皆有罪發卒二千  
人為晉王伊蘓特穆爾治邸舍是月江浙湖廣江西河  
南兩淮屬郡饑於鹽茶課鈔內折粟遣官賑之詔富家  
能以私粟賑貸者量授以官保定河間晉寧等郡水德

州蝗八月甲午中書省臣言內降旨與官者八百八十餘人已除三百未議者猶五百餘請自今越奏者勿與帝曰卿等言是自今不由中書奏者勿與官又言外任官帶相銜非制也請勿與制可又言以朝會應賜者為鈔總三百五十萬錠已給者百七十萬未給猶百八十八萬兩都所儲已虛自今特奏乞賞者宜暫停有旨自今凡以賞為請者勿奏御史臺臣言中書省樞密院御史臺宣政院得自選官具有成憲今監察御史廉訪司官

非本臺公選而從諸臣所請自內降旨非祖宗成法帝  
曰凡若此者卿等其勿行浙東浙西湖北江東郡縣饑  
遣官賑之賜山後驛戶鈔每驛五百錠置掌儀署秩五  
品設令丞各一員乙未賜諸王昂輝鄂爾和北寧王德  
勒格爾布哈金三百五十兩銀三千七百兩以治書侍  
御史額卜德呀勒為中書叅知政事戊戌御史大夫托  
克托封秦國公辛丑迤北民新附者置傳輸粟賑之癸  
卯改伊埒哈雅營田司為屯田運糧萬戶府甲辰以納

琳布拉克所儲糧萬石賑旁近饑民丙午建佛閣於五  
臺寺江南饑以十道廉訪司所儲贓罰鈔賑之己酉從  
皇太子請陞詹事院從一品置叅議斷事官如樞密院  
辛亥中書右丞博囉特穆爾以國字譯孝經進詔曰此  
乃孔子之微言自王公達於庶民皆當由是而行命中  
書省刻板模印諸王而下皆賜之癸丑唐古圖魯格軍  
乏食發粟賑之丙辰陞開遺監秩三品丁巳以中書左  
丞王壽為御史中丞戊午中書平章政事竒塔特布濟

克綽和爾拜布哈並加太尉右丞塔海加太尉平章政事  
以中書左丞博囉特穆爾為中書右丞東昌汴梁唐州  
延安潭沅歸澧興國諸郡饑發粟賑濟之冀寧路地震  
河間真定等郡蝗隆平文水平遙祁霍邑靖海容城東  
鹿等縣水九月甲子車駕至自上都乙丑請諡皇考皇  
帝大行皇帝于南郊命中書右丞相塔喇海攝太尉行  
事庚午陞御史臺從一品辛未加塔喇海塔斯布哈並  
太尉壬申命塔喇海奉玉冊玉寶上皇考及大行皇帝

尊諡廟號又上先元妃鴻吉哩氏尊諡祔于成宗廟室  
陞尚舍監秩正三品癸酉太白犯右執法甲戌改太常  
寺為太常禮儀院秩正二品陞侍儀司秩正三品丙子  
置皇太子位典牧監秩正三品中書省臣言內外選法  
向者有旨一遵世祖成制兩宮近侍遷敘為上所命比  
有應入常調者夤緣驟遷其已仕廢黜及未嘗入仕者  
亦復請自內降旨臣等奏請禁止蒙賜允從是後所降  
內旨復有百餘臣等已嘗銓擇奉行第中書政務他人

又得輒請責以整飭其效寔難自今銓選錢穀請如前制非由中書議者毋得越奏制從之又言比克爾格木騰獻寶貨勅以鹽萬引與之仍許市引九萬臣等竊謂所市寶貨既估其直止宜給鈔若給以引徒壞鹽法帝曰此朕自言非臣下所請其給之餘勿視為例江浙饑中書省臣言請令本省官租於九月先輸三分之一以備賑給又兩淮漕河淤澀官議疏濬鹽一引帶收鈔二貫為傭費計鈔二萬八千錠今河流已通宜移以賑饑



民杭州一郡歲以酒糜米麥二十八萬石禁之便河南  
益都諸郡亦宜禁之制可塔喇海言比蒙聖恩賜臣江  
南田百頃今諸王公主駙馬賜田還官臣請還所賜從  
之仍諭諸人賜田悉還官命張留孫知集賢院事領諸  
路道教事丁丑中書省臣言比議省臣員數奉旨依舊  
制定為十二員右丞相塔喇海左丞相塔斯布哈平章  
綽和爾奇塔特布濟克如故餘令臣等議請以阿實克  
布哈塔斯哈雅為平章政事巴勒達實劉正為右丞郝

天挺額森特穆爾為左丞于璋額卜德呼勒為叅知政  
事其班朝諸司冗員並宜揀汰從之己卯太白犯左執  
法壬午改尚乘寺為衛尉院秩從二品甲申詔立尚書  
省分理財用命塔喇海塔斯布哈仍領中書以托克托  
嘉琿帕哈哩鼎任尚書省仍俾其自舉官屬命鑄尚書  
省印敕弛江浙諸郡山澤之禁丙戌陞掌謁司秩三品  
皇太子建佛寺請買民地益之給鈔萬七百錠有奇戊  
子陞延慶司秩從二品己丑遣使錄囚晉王伊蘓特穆

爾以詔賜鈔萬錠止給八千為言中書省臣言帑藏空竭常賦歲鈔四百萬錠各省備用之外入京師者二百八十萬錠常年所支止二百七十餘萬錠自陛下即位以來已支四百二十萬錠又應求而未支者一百萬錠臣等慮財用不給敢以上聞帝曰卿之言然自今賜予宜暫停諸人毋得奏請可給晉王鈔千錠餘移陝西省給之以中書平章政事拜布哈為江浙行省平章政事辛卯御史臺臣言至元中阿哈瑪特綜理財用立尚書

省三載併入中書後僧格用事復立尚書省事敗又併入中書粵自大德五年以來四方地震水災歲仍不登百姓重困便民之政正在今日頃又聞為總理財用立尚書省如是則必增置所司濫設官吏殆非益民之事也且綜理財用在人為之若止命中書整飭未見不可臣等隱而不言懼將獲罪帝曰卿言良是此三臣願任其事姑聽其行焉是月襄陽霖雨民饑救河南省發粟賑之十月乙未陞典寶署為典寶監秩正三品庚子中

書省奏初置中書省時太保劉秉忠度其地宜裕宗為

中書令嘗至省署勅其後僧格遷立尚書省不四載而

罷今復遷中書於舊省乞涓吉徙中書令位仍請皇太

子一至中書制可壬寅陞典瑞監為典瑞院秩從二品

封知樞密院事綽和爾為容國公癸卯以舊制諸王駙

馬事務皆內侍宰臣所領命中書右丞博囉特穆爾領

之乙巳太白犯亢敕方士日者毋游諸王駙馬之門丙

午詔整飭臺綱布告中外封御史大夫特古勒德爾為

鄆國公以中衛親軍都指揮使邁努知樞密院事壬子  
從中書省臣言凡事不由中書輒遣使移文者禁止之  
甲寅太陰犯明堂陞集賢院秩從一品將作院秩從二  
品丙辰以行省平章總督軍馬得佩虎符其左丞等所  
佩悉追納中書省奏常歲海漕糧百四十五萬石今江  
浙歲儉不能如數請仍舊例湖廣江西各輸五十萬石  
並由海道達京師從之己未塔斯布哈上疏言政事且  
辭太尉職還所降制書及印是月杭州平江水民饑發

粟賑之十一月癸亥封諸王伊克圖為楚王賜金印置  
王傳建佛寺於五臺山乙丑中書省臣言宿衛廩給及  
馬駝芻料父子兄弟世相襲者給之不當給者請令博  
克遜汰之今會是年十月終馬駝九萬三千餘至來春  
二月闕芻六百萬束料十五萬石比又增馬五萬餘匹  
此國重務臣等敢以上聞有旨不當給者勿給丙寅帝  
朝隆福宮上皇太后玉冊玉寶丁卯太白犯房庫爾巴  
雅爾言更用銀鈔銅錢便命中書與樞密院御史臺集

賢翰林諸老臣集議以聞己巳中書省臣阿實克布哈博囉特穆爾言臣等與庫爾巴雅爾面論折銀鈔銅錢非便有旨卿等以為不便勿行可也詔中書省官十二員托克托仍領宣政院嘉琿留京師餘各任以職庚午盧龍灤河遷安昌黎撫寧等縣水民饑給鈔千錠以賑之辛未以塔喇海領中政院事乙亥中書省臣言大都路供億浩繁槩於屬郡取之其軍站鷹坊控鶴等戶恃其雜徭無與冒占編氓請降璽書依祖宗舊制悉令均



當或輒奏請者亦宜禁止制可皇太子言近蒙恩以安西吉州平江為分地租稅悉以賜臣臣恐宗親昆弟援例自五戶絲外餘請輸之內帑其陝西運司歲辦鹽十萬引向給安西王以此錢斟酌與臣惟陛下裁之中書計會三路租稅及鹽課所入鈔四十萬錠有旨皇太子所思甚善歲以十萬錠給之不足則再賜樂工毆人刑部捕之王宸樂院長謂王宸與刑部秩皆三品官皆榮祿大夫留不遣中書以聞帝曰凡諸司視其資級授之

散官不可超越其閑冗職名官高者遵舊制降之建康路屬州縣饑詔免今年酒醋課丙子太陰犯東井丁丑中書省臣言前為江南大水以茶鹽課折收米賑饑民今商人輸米中鹽以致米價騰湧百姓雖獲小利終為無益臣等議茶鹽之課當如舊從之戊寅授皇太子王冊己卯以皇太子受冊禮成帝御大明殿受諸王百官朝賀庚辰中書省臣言皇太子謂臣等曰吾之分地安西平江吉州三路遵舊制自達嚕噶齊之外悉從常選

其常選宜速擇才能有旨其擇人任之乙酉太陰犯亢  
詔皇太后軍民人匠等戶租賦徭役有司勿與並隸徽  
政院陞太僕院秩從二品丁亥杭州平江等處大饑發  
糧五十萬一千二百石賑之庚寅賜太師伊徹察喇江  
南田四十頃時賜田悉奪還官中書省為言有旨伊徹  
察喇自世祖時積有勲勞非餘人比宜以前後所賜合百頃  
與之仍敕行省平章拜布哈領其歲入辛卯辰星犯歲星  
從皇太子請御史臺檢覈詹事院文案十二月壬辰朔

中書省臣言舊制金虎符及金銀符典瑞院掌之給則由中書事已則復歸典瑞院今出入多不由中書下至商人結託近侍奏請以致泛濫出而無歸臣等請覈之自後除官及奉使應結者非由中書省勿給從之又言今國用甚多帑藏已乏用及鈔母非宜鹽引向從運司與民為市今權時制宜從戶部鬻鹽引八十萬便有旨今歲姑從所請後勿復行又言太府院為內藏世祖成宗朝遇重賜則取給中書今所賜有踰千錠至萬錠者

皆取之太府比者太府取五萬錠已支二萬今復以乏

告請自後內府所用數多者仍取之中書帝曰此朕特

旨後當從所奏乙未竒塔特岱爾等擾檀州民強取米

粟六百餘石詔官訊之辛丑幸大聖壽萬安寺授吏部

尚書察納平章政事領工部事癸卯以漢軍萬人屯田

和琳命留守司以來歲正月十五日起燈山於大明殿

後延春閣前庚戌陞行泉府司為泉府院秩正二品以

蒙古萬戶圖沁特穆爾有平內難功加鎮國上將軍陞

皇太子典醫署為典醫監秩正三品山東河南江浙饑  
禁民釀酒丁巳以中書省言國用浩穰民貧歲歉詔宣  
政院併省佛事大都上都二驛設教授官二員餘驛一  
員敕諸王公主駙馬使臣給璽書驛券不許輒用圓符  
乘驛中書省臣言驛戶疲乏宜量事給驛今經費浩大  
其收售寶貨權宜停罷又陛下即位詔書不許越職奏  
事比者近侍奏除官丐賞者皆自內降旨請今不經中  
書省勿行又刑法者譬之權衡不可偏重世祖已有定

制自元貞以來以作佛事之故放釋有罪失於太寬故有司無所遵守今請凡內外犯法之人悉歸有司依法裁決又各處民饑除行宮外工役請悉停罷皆從之又言律令者治國之急務當以時損益世祖嘗有旨金泰和律勿用令老臣通法律者參酌古今從新定制至今尚未行臣等謂律令重事未可輕議請自世祖即位以來所行條格校讐歸一遵而行之制可與申詔曰仰惟祖宗應天撫運肇啟疆宇華夏一統罔不率從逮朕嗣

服丕圖纘膺景命遵承詒訓恪慕洪規祇惕畏兢未知  
攸濟永思創業艱難之始玆然軫念而守成萬事之統  
在予一人故自即位以來溥從寬大量能授官俾勤乃  
職夙夜以永康兆民為急務間者歲比不登流民未還  
官吏並緣侵漁上下因循和氣乖戾是以責任股肱耳  
目大臣思所以盡瘁贊襄嘉猷朝夕入告朕命惟允庶  
事克諧樂與率土之民共享治安之化邇寧遠肅顧不  
遑歟可改大德十二年為至大元年誕布惟新之令式



孚永固之休存恤征戍蒙古漢軍拯治展齊消乏弛山  
場河泊蘆蕩禁園獵飛放毋得騷擾百姓招誘流移人  
戶禁投屬集賽台鷹房避役濫請錢糧勸農桑興學校  
議貢舉旌賞孝弟力田懲戒游惰政令得失許諸人上  
書陳言僧道並依舊制納稅凡選法錢糧刑名造作一  
切公事近侍人員毋得隔越聞奏敕內庭作佛事毋釋  
重囚以輕囚釋之

至大元年春正月辛酉朔曲赦御史臺見繫犯贓官吏

罪止徵贓罷職癸亥敕樞密院發六衛軍萬八千五百人供翁果察圖建宮工役甲子授中書平章政事阿寶克布哈右丞相行御史大夫丙寅從江浙行省請罷行都水監以其事隸有司立皇太子位典幄署承和署秩並正五品丁卯以中書右丞伊克德濟為平章政事議陝西省事己巳紹興台州慶元廣德建康鎮江六路饑死者甚衆饑戶四十六萬有奇戶月給米六斗以沒入朱清張瑄物貨隸徽政院者鬻鈔三十萬錠賑之特授

乳母之夫壽國公楊延嘉努開府儀同三司緬國進馴  
象六辛未樞密院臣言先奉旨以中衛親軍隸皇太子  
位皇太子謂臣等曰世祖立五衛以應五方去一不可  
宜各翼選漢軍萬人別立一衛帝以為然敕知院事特  
穆爾布哈等摘漢軍萬人別立衛甲戌中書省臣言進  
海東青鶻者當乘驛馬五百不敷遣齊喇英通括民間  
車馬兵部請以各驛馬陸續而進勿括為便從之改徵  
政院人匠總管府為繕珍司秩正三品己卯陞中尚監

為中尚院秩從二品幽王徹伯爾進玉六百一十五斤  
賜金千五百兩銀二萬兩鈔萬錠從人四萬錠科緡額  
森布格等金二千三百兩銀一萬七百兩鈔三萬九千  
一百錠甲申勅緡和爾除登極恩例外特賜金五百兩  
銀千兩鈔二千錠戊子皇太子請以阿寶克布哈復入  
中書托克托復入御史臺己丑中書省臣言阿寶克特  
穆爾請遣嘉琿達詣河西地采玉馱攻玉沙需馬四十  
餘匹采玉人千餘臣等以為不急之務勞民乞罷之又

言近百姓艱食盜賊充斥苟不嚴治將滋蔓宜遣使巡  
行遇罪囚即決遣與隨處官吏議弭盜方略明立賞罰  
或匿盜不聞或期會不至或踰期不獲者官吏連坐又  
言江浙行省海賊出沒殺虜軍民其已獲者例合結案  
待報宜從中書省伊克扎爾古齊遣官同行省行臺宣  
慰司廉訪司審錄無冤棄之於市其未獲者督責追捕  
自首者原罪給粟能禽其黨者加賞有旨弭盜安民事  
為至重即議行之封諸王額森特穆爾為營王以乳母

夫鄂爾多為司徒二月癸巳立鷹坊為仁虞院秩正一品以右丞相托克托遙授左丞相推勒特穆爾伊克扎爾古齊伊爾齊並為仁虞院使汝寧歸德二路旱蝗民饑給鈔萬錠賑之甲午增泉府院副使同僉各一員益都濟寧般陽濟南東平泰安大饑遣山東宣慰使王佐同廉訪司覈實賑濟為鈔十萬二千二百三十七錠有奇糧萬九千三百四十八石乙未中書省臣言陛下登極以來錫賞諸王恤軍力賑百姓及殊恩泛賜帑藏

空竭豫賣鹽引今和琳甘肅大同隆興兩都軍糧諸所  
營繕及一切供億合用鈔八百二十餘萬錠往者或遇  
匱急奏支鈔本臣等固知鈔法非輕曷敢輒動然計無  
所出今乞權支鈔本七百一十餘萬錠以周急用不急  
之費姑後之帝曰卿等言是泛賜者不以何人毋得蒙  
蔽奏請陞尚舍監為尚舍寺秩正三品丙申立甄用監  
秩正三品隸徽政院淮安等處饑從河南行省言以兩  
浙鹽引十萬貿粟賑之戊戌以上都衛軍三千人赴翁

果察圖行宮工役壬寅中書省臣言桂齊擾害檀州民  
敕遣人往訊其辭伏者宜加罪有旨勿問臣等以為非  
宜已辭伏者先為決遣帝曰俟其獵畢治之從皇太子  
請改詹事院使為詹事副詹事為少詹事院判為丞立  
尚服院秩從二品中書省臣言陝西行省言開成路前  
者地震民力重困已免賦二年請再免今年從之甲辰  
賜國王和通金二百五十兩銀七百五十兩立皇太子  
衛率府發軍千五百人修五臺山佛寺命有司市邸舍



一區以賜丞相齊勤特穆爾為鈔萬九千四百錠丁未  
用丞相奎騰言設尚冠尚衣尚鞞尚沐尚輦尚飾六奉  
御秩五品凡四十八員隸尚服院甲寅和琳貧民北來  
者衆以鈔十萬錠濟之仍於大同隆興等處糴糧以賑  
就令屯田諸內侍太醫陰陽樂人毋援常選散官以網  
罟給和琳饑民戊午遣布達達實等送瓜哇使還己未  
以皇太子建佛寺立營繕署秩五品三月庚申朔中書  
省臣言郇王哲古訥人戶散失詔有司括索臣等議昔

阿濟格括索所失人戶成宗慮其為例不許今若括索未免擾民且諸王必多援例乞寢其事從之又莊聖皇  
后及諸王胡土克圖人戶散入他郡阿都齊托歡降璽  
書俾括索陝西行省及真定等路言百姓均在國家版  
籍今所遣使輒奪軍驛編民等戶非宜中書省以聞帝  
曰彼奏誤也卿等速追以還賜鎮南王婁章金五百兩  
銀五千兩鈔二千錠幣帛八百匹額森布哈伊喇希金  
各二百五十兩銀七百五十兩鈔二千錠乙丑太陰犯

井以北來貧民八十六萬八千戶仰食於官非久計給鈔百五十萬錠幣帛準鈔五十萬錠命太師伊徹察喇太傅哈喇哈斯分給之罷其廩給詔賜諸王拜呼金百五十兩銀七百五十兩丁卯建興聖宮給鈔五萬錠絲二萬斤遣使祀五嶽四瀆名山大川賜諸王班布爾實金五百兩銀五千兩復立白雲宗攝所秩從一品官三員戊寅車駕幸上都建佛寺於大城南立驥用資武二庫秩正五品隸府正司陞太史院秩從二品司天臺

秩正四品封右丞相行平章政事阿實克布哈為康國  
公以甘肅行省右丞托克托穆爾為中書平章政事加  
大司徒賜晉王所部五百四十七人鈔五萬二千九百  
六十錠定王永和爾金一千五百兩銀三萬兩鈔萬錠  
衛士五十三人鈔萬六百錠己卯命翰林國史院纂修  
順宗成宗實錄壬午嗣漢天師張與材來朝加金紫光  
祿大夫封留國公夏四月戊戌中書省臣言請依原降  
詔敕勿超越授官泛濫賜賚帝曰卿等言是朕累有旨

止之又復蒙蔽以請自今縱有旨卿等其覆奏罪之詔以永平路鹽課賜僧格喇實公主中書省臣執不可從之賜諸王瑪納濟金五十兩銀千兩鈔千錠賜皇太子位鷹坊鈔二十萬錠戊戌封三寶努為渤海國公實沙為賓國公加特們勒德爾右丞相都護邁珠中書右丞立皇太子位人匠總管府秩正三品癸卯加平章政事嘉琿太子太保太尉平章軍國重事魏國公甲辰陞典瑞監為典瑞院秩從二品知樞密院事額爾吉納違授石

丞相辛亥樞密院臣言諸王各用其印符乘驛使臣旁  
午驛戶困乏宜準舊制量其馬數降以璽書奏可乙卯  
遣米楫等使蘓魯國丙辰高麗國王王珉言陛下令臣  
還國復設官行征東行省事高麗歲數不登百姓乏食  
又數百人仰食其土則民不勝其困且非世祖舊制帝  
曰先請立者以卿言今請罷亦以卿言其準世祖舊制  
速遣使往罷之五月丙寅降英德路為州知樞密院事  
塔爾呼岱遙授左丞相丁卯御史臺臣言成宗朝建國

子監學迄今未成皇太子請畢其功制可己巳管城縣  
大雨電緬國進馴象六乙亥知樞密院事哈喇格爾遙  
授左丞相丙子以諸王及西番僧從駕上都途中擾民  
禁之禁白蓮社毀其祠宇以其人還隸民籍御史臺臣  
言比奉旨罷不急之後今復為各官營私宅臣等以為  
侯翁果察圖行宮及大都五臺寺畢工然後從事為宜  
有旨除奎騰三寶努所居餘悉罷之授右丞相塔斯布  
哈上柱國監修國史加左丞相竒塔特布濟克太子太

傅辛巳中書省臣言舊制樞密院御史臺宣政院得自  
選官諸官府必由中書省奏聞宜申嚴告諭制可癸未  
濟南般陽雨雹甲申立大同侍衛親軍都指揮使司以  
丞相齊勤特穆爾為使摘通惠河漕卒九百餘人隸之  
漕事如故渭源縣旱饑給糧一月真定大名廣平有蟲  
食桑寧夏府水晉寧等處蝗東平東昌益都蠃六月己  
丑渤海國公三寶努加錄軍國重事中書右丞相應國公  
太子詹事平章軍國重事大司農庫春加太子太保左



丞相托克托加上柱國太尉遙授叅知政事行詹事丞  
達實多平章軍國重事甲午改太子位承和署為典樂  
司秩正三品丁酉鞏昌府隴西寧遠縣地震雲南烏撒  
烏蒙三日之中地大震者六戊戌大都饑發官廩減價  
糶貧民戶印帖委官監臨以防不均之弊中書省臣言  
江浙行省管內饑賑米五十三萬五千石鈔十五萬四  
千錠麩四萬斤又流民戶百三十三萬九百五十有奇  
賑米五十三萬六千石鈔十九萬七千錠鹽折直為引

五千令行省行臺遣官臨視內郡江淮大饑免今年常賦及夏稅益都水民饑采草根樹皮以食免今歲差徭仍以本路稅課及發朱汪利津兩倉粟賑之封永和爾為定王駙馬阿實克為昌王並賜金印以司徒平章政事領大司農李邦寧遙授左丞相辛丑以沒入朱清張瑄田產隸中書立江浙財賦總管府提舉司己酉減太常禮儀院官二十七員為八員河南山東大饑有父食其子者以兩道沒入贓鈔賑之加竒塔特布濟克錄軍

國重事保定真定蝗秋七月庚申流星起自勾陳南行  
圓若車輪微有銳經貫索滅敕以金銀歲入數少自今  
毋問何人以金銀為請奏及托之奏者皆抵罪各處行  
省宣慰司等官多以結托來京師今後非奉朝命毋赴  
闕雲南湖廣河南四川盜賊竊發諭軍民官用心撫治  
立廣武喀喇侍衛親軍都指揮使司以中書平章政事  
阿實克布哈為都指揮使壬戌皇子和實拉請立總管  
府領提舉司四括河南歸德汝寧境內瀕河荒地約六

萬餘頃歲收其租令河南省臣高興總其事中書省臣  
言瀕河之地出沒無常遇有退灘則為之主先是有伊  
瑪噶者妄稱省委括地蠶食其民以有主之田俱為荒  
地所至騷動民高榮等六百人訴於都省追其驛券方  
議其罪遇赦獲免今乃獻其地于皇子且河南連歲水  
災人方闕食若從所請設立官府為害不細帝曰安用  
多言其止勿行禁鷹坊於大同隆興等處縱獵擾民築  
呼鷹臺於瀋州澤中發軍千五百人助其役翁果察圖

行宮成立中都留守司兼開寧路都總管府丙寅復置

泰安州之新泰縣辛卯濟寧大水入城詔遣官以鈔五  
千錠賑之己巳真定淫雨水溢入自南門下及豪城溺  
死者百七十七人發米萬七百石賑之辛未立御香局  
秩正五品壬申太白犯左執法實沙加太子太傅遣塔  
齊爾等九人使諸王科綽遣伊魯等十二人使諸王托  
克托癸酉詔諭安南國曰惟我國家以武功定天下文  
德懷遠人乃眷安南自乃祖乃父世修方貢朕甚嘉之

邇者先皇帝晏駕朕方撫軍朔方為宗室諸王貴戚元  
勲所推戴以朕乃世祖嫡孫裕皇正派宗藩効順於外  
臣民屬望於下人心所共神器有歸朕俯徇輿情大德  
十一年五月二十一日即皇帝位於上都今遣少中大  
夫禮部尚書阿勒呼木朝請大夫吏部侍郎李京朝列  
大夫兵部侍郎高復禮諭旨尚體同仁之視益堅事大  
之誠輯寧爾邦以稱朕意又以袞楚克戩為禮部侍郎  
多爾濟為兵部侍郎使緬國遣托里布哈等二十人使

諸王哈喇班第弛上都酒禁壬午置皇太子司議郎秩正五品封奈曼岱為壽王癸未樞密院臣言世祖時樞密臣六員成宗時增至十三員今署事者三十二員乞省之敕罷塔斯岱等一十一人甲申太師淇陽王伊徹察喇請置王傅中書省臣謂異姓王無置傅例不許乙酉以泰虎人徹爾濟蘓為監察御史以左丞相塔斯布哈為中書右丞相太保竒塔特布濟克為中書左丞相內外大小事務並聽中書省區處諸王公主駙馬勢要人

等毋得攬擾沮壞近侍臣員及內外諸衙門毋得隔越  
聞奏各處行省宣慰司及在外諸衙門等官非奉聖旨  
并中書省明文毋得擅自離職乘驛赴京營幹私事江  
南江北水旱饑荒已嘗遣使賑恤者至大元年差發官  
稅並行除免八月戊子大寧雨雹丙申御史臺臣言奉  
勅逮監察御史斯多卜丹赴上都世祖成宗迄於陛下  
累有明旨監察御史乃朝廷耳目中外臣僚作姦犯科  
不職者聽其糾劾治事之際諸人毋得與邇者鞠問刑



部尚書烏魯克實贓罪蒙旨獎諭諸御史皆被錫賚臺  
綱益振今斯多卜丹被逮同列皆懼所係非小乞寢是  
命申明臺憲之制諸人毋得與聞制可辛丑以中都行  
宮成賞官吏有勞者工部尚書哈瑪爾下並陞二等賜  
塔拉爾銀二百五十兩同知察納通政使塔喇齊同知  
留守蕭珍工部侍郎達實密金二百兩銀一千四百兩  
軍人金二百兩銀八百兩死於木石及病沒者給鈔有  
差癸卯加中書右丞領將作院呂天麟大司徒戊申立

中都萬億司寧夏立河渠司秩五品官二員叅以二僧  
為之特授奎騰太師賜諸王托歡金二百兩銀二千五  
百兩鈔二千錠阿里布哈金百兩銀千兩鈔千錠己酉  
大同隕霜殺禾甲寅李邦寧以建香殿成賜金五十兩  
銀四百五十兩乙卯中書省臣言外臺行省及諸人應  
詔言事未敢一一上煩聖聽請集朝臣議擇其切於事  
者小則輒行大則以聞從之揚州淮安蝗九月丙辰以  
內郡歲不登諸都人馬之入都城者減十之五中書省

臣言夏秋之間鞏昌地震歸德暴風雨泰安濟寧真定大水廬舍蕩析人畜俱被其災江浙饑荒之餘疫癘大作死者相枕籍父賣其子夫驚其妻哭聲震野有不忍聞臣等不才猥當大任雖欲竭盡心力而聞見淺狹思慮不廣以致政事多舛有乖陰陽之和百姓被其災殃願退位以避賢路帝曰災害事有由來非爾所致汝等但當慎所行立齊哩克昆提舉司秩正五品設官四員高麗國王王昉卒命薩納台特默徹爾使賽瑪爾堪部

己未陞中政院秩從一品辛酉遣人使諸王徹伯爾科  
綽所壬戌太尉托克托奏泉州大商哈蘓台吉嚕進異  
木沉檀可構宮室者敕江浙行省驛致之癸亥萬戶伊  
拉瑪和斯來自賽瑪爾堪等城進太祖時所造戶口冊  
賜銀鈔幣帛有差丙寅蒲縣地震癸酉陞內史府為內  
史院秩正二品乙亥車駕至自上都弛諸路酒禁戊寅  
泉州大商瑪哈丹達爾進珍異及寶帶西域馬庚辰以  
高麗國王王章嗣高麗王諸王圖們進所藏太宗玉璽

封圖們為陽翟王賜金印中書省臣言奉旨連歲不登從駕四衛一衛約四百人所給芻粟自如常例給各部者減半臣等議大都去歲飼馬九萬四千疋今請減為五萬疋外路飼馬十一萬九千餘疋今請減為六萬疋自十月十五日為始又言賽瑪爾堪德呼蘓達實允等城三年民賦以輸縣官今因薩納台特默徹勒往彼宜令以二年賦與科綽給與原輸之人以一年者上進並從之癸未太陰犯熒惑立中都虎賁司特授承務郎直

省舍人桑節沙資善大夫行泉府院使冬十月庚寅為  
太師奎騰建第給鈔二萬錠癸巳蒲縣陵縣地震甲午  
以阿實克布哈知樞密院事丁酉以大都艱食復糴米  
十萬石減價以賑之以其鈔於江南和糴罷大都榷酤  
賜皇太子金千兩辛丑太白犯南斗癸卯中書省臣請  
以湖廣米十萬石貯於揚州江西江浙海漕三十萬石  
內分五萬石貯朱汪利津二倉以濟山東饑民從之救  
凡持內降文記買河間鹽及以諸王駙馬之言至運司

者一切禁之持內降文記不由中書者聽運司以聞禁  
奉符長清泗水章丘霑化利津無棣七縣民田獵甲辰  
從帝師請以釋教總管多爾濟巴勒領囊巴地產錢物  
為都總管府達嚕噶齊總其財賦以西番僧嘉勒幹巴  
勒為翰林承旨左丞相知樞密院事特穆爾布哈加錄  
軍國重事中書右丞司徒圖古勒河南江北行省右丞  
伊蘓內史托卜華並知樞密院事乙巳改護國仁王寺  
昭應規運總管府為會福院秩從二品丙午立興聖宮

掌醫監秩正三品十一月己未省臣言世祖時省院臺及諸司皆有定員後略有增者成宗己嘗有旨併省邇者諸司遞陞四品者三品三品者二品二品者一品一司甚至二三十員事不改舊而官日增請依大德十年己定員數冗濫者從各司自與減汰衙門既陞諸吏止從舊秩出官果應例者自如選格從之庚申太白晝見以軍五千人供造寺工役增官吏俸以至元鈔依中統鈔數給之止其祿米歲該四十萬石吏員以九十月出



身如舊制詔免紹興慶元台州建康廣德田租紹興被  
災尤甚今歲又旱凡佃戶止輸田主十分之四山塲河  
漕商稅截日免之諸路小稔審被災者免之乙丑賜諸  
王訥默古哩金印丁卯中書省臣言今銓選錢糧之法  
盡壞廩藏空虛中都建城大都建寺及為諸貴人營私  
第軍民不得休息邇者用度愈廣每賜一人輒至萬錠  
惟陛下矜察又言銓選錢糧諸司乞毋干預帝曰已降  
制書令諸人毋干中書之政他日或有乘朕忽忘持內

降文記及傳旨至中書省其執之以來朕將加罪以伊  
勒濟呼為御史大夫己己以竒塔特布濟克為右丞相  
托克托為左丞相既又從托克托言以塔斯布哈與竒  
塔特布濟克俱為右丞相省臣言國用不給請沙汰宣  
徽太府利用等院籍定應給人數其在上都者委官裁  
省又行泉院以守寶貨為任宜禁私獻寶貨者又天下  
屯田百二十餘所由所用者多非人以致廢弛除四川  
甘州應昌府雲南為地絕遠餘當選習農務者往與行

省宣慰司親履其地可興者興可廢者廢各具籍以聞  
並從之詔開寧路及宣德雲州工役供億浩繁其賦稅  
除前詔已免三年外更免一年辛巳罷益都諸處哈喇  
齊等狩獵以銀七百五十兩鈔二千二百錠幣帛三百  
疋施昊天寺為水陸大會癸未皇太后造寺五臺山摘  
軍六千五百人供役閏十一月己丑以大都米貴發廩  
十萬石減價糶賑貧民北來饑民有鬻子者命有司為  
贖之乙未賜故中書右丞相鄂勒哲妻金五百兩銀千

五百兩丙申罷江南進沙糖止富民輸粟賑饑補官丁  
酉禁江西湖廣汴梁私捕鴛鴦已亥罷遼陽省進雕豹  
桂齊衛受烏江縣達嚕噶齊獻私戶萬令隸縣官壬寅  
竒塔特布濟克乞賜固安田二百餘頃從之乙巳中書  
省臣言回回商人持璽書佩虎符乘驛馬名求珍異既  
而以一豹上獻復邀回賜似此甚衆臣等議虎符國之  
信器驛馬使臣所需今以畀諸商人誠非所宜乞一槩  
追之制可罷順德廣平鐵冶提舉司聽民自便有司稅

之如舊丁未復立汴梁路之項城縣以杭州紹興建康等路歲比饑饉今年酒課免十分之三勅河西僧戶準先朝定制從軍輸稅一與民同甲寅達爾罕哈喇哈斯卒十二月庚申封哈拉織為隴王賜金印平江路民有隸竒德哩部者依舊制差賦與民一體均當雲南輝和爾一千人居荆襄雲南省臣言世祖有旨使歸雲南以佐征討中書省臣議發還為是從之中都立開寧縣降隆興為源州陞蔚州為蔚昌府省河東宣慰司以大同

路隸中都留守司冀寧晉寧二路隸中書省甲戌以平  
章政事商議中書省事太子賓客王太亨行太子詹事  
平章軍國重事太子少詹事達實多為太子詹事賜御  
史臺官及監察御史宴服

元史卷二十二

元史卷二十二考證

武宗本紀至大元年五月己巳緬國進馴象六 案是  
年正月己巳下己書緬國進馴象六此當係複文







總校官編修臣吳紹深

欽定四庫全書薈要

史部  
元史卷二十三  
四

詳校官主事銜臣徐以坤



欽定四庫全書薈要卷六千四百二 史部

元史卷二十三

明翰林學士亞中大夫知制誥兼修國史宋濂等修

紀第二十三

武宗二

二年春正月己丑從皇太子請罷宮師府設賓客諭德  
贊善如故庚寅越王圖喇有罪賜死禁日者方士出入  
諸王公主近侍及諸官之門辛卯皇太子諸王百官上



尊號曰統天繼聖欽文英武大章孝皇帝乙未恭謝太廟丙申詔天下弛山澤之禁恤流移毋令見戶包納差稅被災百姓內郡免差稅一年江淮免夏稅內外大小職官普覃散官一等有出身人考滿者加散官一等己亥封知樞密院事容國公綽和爾為句容郡王乙巳塔斯布哈奇塔特布濟克言諸人恃恩徑奏璽書不由中書直下翰林院給與者覈其數自大德六年至至大元年所出六千三百餘道皆于田土戶口金銀鐵冶增餘

課程進貢奇貨錢穀選法詞訟造作等事害及於民請  
盡追奪之今後有不由中書者乞勿與制可丙午定制  
大成至聖文宣王春秋二丁釋奠用太牢戊申德呼特  
穆爾布哈進鷹犬命歲以幣帛千匹鈔千錠與之二月  
戊午鑄金印賜句容郡王綽和爾賑真定路饑民糧萬  
石塔坦境六千石癸亥皇太子幸五臺佛寺罷行泉府  
院以市舶歸之行省乙丑以和琳屯田去秋收九萬餘  
石宣慰司官吏部校軍士給賞有差己巳太陰犯亢辛

未太陰犯氏調國王部及呼拉干齊烏嚕克台多喇等  
軍九千五百人赴和琳壬申令各衛董屯田官三年一  
易甲戌弛中都酒禁三月己丑遼陽行省右丞洪重喜  
訴高麗國王王章不奉國法恣暴等事中書省臣請令  
重喜與高麗王辯對敕中書毋令辯對令高麗王從太  
后之五臺山梁王在雲南有風疾以諸王羅丹代梁王  
鎮雲南賜金二百五十兩銀七百五十兩從者幣帛有  
差庚寅車駕幸上都摘五衛軍五十人隸中都虎賁司

封諸王額布根為襄寧王辛卯罷杭州白雲宗攝所立  
湖廣頭陀禪錄司丙申賜雲南王羅丹金印戊戌太陰  
犯氏己亥熒惑犯歲星封公主阿喇特納巴拉為趙國公  
主駙馬專為趙王甲辰中書省臣言國家歲賦有常頃  
以歲儉計所入者曾不及半而去歲所支鈔至千萬錠  
糧三百萬石陛下嘗命汰其求芻粟者而宣徽院博克  
遜竟不能行視去歲反多三十萬石請用知錢穀者二  
三員於宣徽院佐而理之又中書省斷事官大德十年



四十三員今皇太子位增二員諸王庫庫楚喇嘛噶圖  
勒亦各增一員非舊制臣等以為皇太子位所增宜存  
諸王者宜罷並從之陞掌醫署為典醫監乙巳中書省  
臣言中書為百司之首宜先汰冗員帝曰百司所汰卿  
等定議省臣去留朕自思之己酉濟陰定陶雹夏四月  
甲寅中書省臣言江浙杭州驛半歲之間使人過者千  
二百餘有桑兀寶合丁等進獅豹鴉鶻留二十有七日  
人畜食肉千三百餘斤請自今遠方以奇獸異寶來者

依驛遞其商人因有所獻者令自備資力從之辛酉立  
興聖宮江淮財賦總管府詔諭中外癸亥摘漢軍五千  
給田十萬頃於直沽沿海口屯種又益以喀喇軍二千  
立鎮守海口屯儲親軍都指揮使司壬午詔中都創皇  
城角樓中書省臣言今農事正殷蝗蝻徧野百姓艱食  
乞依前旨罷其役帝曰皇城若無角樓何以壯觀先畢  
其功餘者緩之以建新寺鑄提調監造三品銀印益都  
東平東滄濟寧河間順德廣平大名汴梁衛輝泰安高

唐曹漢德揚滁高郵等處蝗五月丁亥以通政院使哈喇格爾知樞密院事董建興聖宮令大都留守養安等督其工丁酉以陰陽家言自今至聖誕節不宜興土功敕權停新寺工役甲辰御史臺臣言乘輿北幸而京師工役正興加之歲旱乏食民愚易惑所關甚重乞留一丞相鎮京師後為例制可六月癸亥選官督捕蝗從皇太子言禁諸賜田者馳驛徵租擾民庚午中書省臣言奉旨既停新寺工役其亭苑鷹坊諸役乞并罷又太醫

院遣使取藥材於陝西四川雲南費公帑勞驛傳臣等  
議事干錢糧隔越中書省徑行乞禁止並從之以益都  
濟南般陽三路寧海一州屬宣慰司餘並令直隸省部  
以大都隸儒籍者四十戶充文廟樂工從皇太子請改  
典樂司提點大使等官為卿少卿丞甲戌以宿衛之士  
比多冗雜遵舊制存蒙古色目之有闕閱者餘皆革去  
皇太子言宣政院先奉旨毆西番僧者截其手詈之者  
斷其舌此法昔所未聞有乖國典且於僧無益僧俗相

犯已有明憲乞更其令又言宣政院文案不檢覈於憲章有礙遵舊制為宜並從之乙亥中書省臣言河南江浙省言宣政院奏免僧道嚕勒昆達實密租稅臣等議田有租商有稅乃祖宗成法今宣政院一體奏免非制有旨依舊制徵之是月金城寧州源州兩電延安之神木碾谷盤西神川等處大雨雹霸州檀州涿州良鄉舒城厯陽合肥六安江寧句容溧水上元等處蝗秋七月癸未河決歸德府境壬辰宣政院臣言武靖王吹巴勒與

圖沙瑪宣慰司言松潘疊宕威茂州等處安撫司管內  
西番圖魯卜降胡漢民四種人雜處昨遣經歷蔡懋昭  
往蛇谷隴迷招之降其八部戶萬七千皆數百年負固  
頑獷之人酋長琳沁巴勒等八人已嘗廷見今琳沁巴  
勒謂其地隣接四川未降者十餘萬宣撫官皆他郡人  
不知蠻夷事纔至成都灌州畏懼即返何以撫治宜改  
安撫司為宣撫司遷治茂州徙松州軍千人鎮遏為便  
臣等議宜從其言詔改松潘疊宕威茂州安撫司為宣

撫司遷治茂州汶川縣秩正三品以巴爾斯德濟為宣  
撫司達嚕噶齊蔡懋昭為副使並佩虎符乙未復置贛  
州龍南安遠二縣以河西二十驛往來使多馬數既少  
民力耗竭命中書省樞密院通政院於諸部撥戶增馬  
以濟之約蘇言鈔法大壞請更鈔法圖新鈔式以進又  
與保巴議立尚書省詔與竒塔特布濟克塔斯布哈齊  
勤特穆爾托克托集議以聞己亥河決汴梁之封邱甲  
辰改實保齊巴勒噶遜總管府為奉時院乙巳保巴言

臣與塔斯布哈竒塔特布濟克等議立尚書省事臣竊  
思政事得失皆中書省臣所為今欲舉正彼懼有累孰  
願行者臣今不言誠以大事為懼陛下若矜憐保巴約  
蘇所議請立尚書省舊事從中書新政從尚書尚書請  
以竒塔特布濟克托克托為丞相三寶努約蘇為平章  
保巴為右丞王巖參知政事姓江者畫鈔式以為印鈔  
庫大使並從之塔斯布哈言此大事遽爾更張乞與老  
臣更議帝不從是月濟南濟寧般陽曹濮德高唐河中



解絳耀同華等州蝗八月壬子中書省臣言甘肅省僻  
在邊垂城中蓄金穀以給諸王軍馬世祖成宗嘗修  
其城池近薩題勒密實擅興兵甲掠豳王徹伯爾輜重  
民大驚擾今薩題勒密實已伏誅其城若不修慮啓寇  
心又沙瓜州摘軍屯田歲入糧二萬五千石薩題勒密  
實叛屯田遂廢今乞仍遣軍屯種選知屯田地利色目  
漢人各一員領之皆從之癸酉立尚書省以竒塔特布  
濟克為太傅右丞相托克托為左丞相三寶努約蘇為

平章政事保巴為右丞孟克特穆爾為左丞王熙為參  
知政事中書左丞劉楫授尚書左丞商議尚書省事詔  
告天下甲寅敕以海拉遜昔與巴延阿珠平江南知兵  
事授平章政事商議樞密院事以阿蘇衛軍五百人隸  
諸王克呼布哈駐和琳給鈔萬五千錠人備四馬己未  
立皇太子右衛率府秩正三品命尚書右丞相托克托  
御史大夫布琳尼敦並領右衛率府事尚書省臣言中  
書省尚有逋欠錢糧應追理者宜存斷事官十人餘皆

併入尚書省又言往者大辟獄具尚書省議定令中書省裁酌以聞宜依舊制從之以江西等處行中書省叅知政事郝彬為尚書省叅知政事甲戌賜太師奎騰名多爾濟噶丁丑永平路隕霜殺禾已卯三寶努言尚書省立更新庶政變易鈔法用官六十四員其中宿衛之士有之品秩未至者有之未歷仕者有之此皆素習於事既已任之乞勿拘例授以宣敕制可詔天下敢有沮撓尚書省事者罪之真定保定河間順德廣平彰德大

名衛輝懷孟汴梁等處蝗九月庚辰朔以尚書省條畫  
詔天下改各行中書省為行尚書省詔朝廷得失軍民  
利害臣民有上言者皆得實封上聞在外者赴所屬轉  
達各處人民饑荒轉徙復業者一切逋欠並行蠲免仍  
除差稅三年田野死亡遺骸暴露官為收拾頒行至大  
銀鈔詔曰昔我世祖皇帝既登大寶始造中統交鈔以  
便民用歲久法隳亦既更張印造至元寶鈔逮今又復  
二十三年物重鈔輕不能無弊迺循舊典改造至大銀

鈔頒行天下至大銀鈔一兩準至元鈔五貫白銀一兩  
赤金一錢隨路立平準行用庫買賣金銀倒換昏鈔或  
民間絲綿布帛赴庫回易依驗時估給價隨處路府州  
縣設立常平倉以權物價豐年收糶粟麥米穀值青黃  
不接之時比附時估減價出糶以遏沸湧金銀私相買  
賣及海舶興販金銀銅鐵綿絲布帛下海者並禁之平  
準行用庫常平倉設官皆於流官內銓注以二年為滿  
中統交鈔詔書到日限一百日盡數赴庫倒換茶鹽酒

醋商稅諸色課程如收至大銀鈔以一當五頒行至大銀鈔二兩至一釐定為一十三等以便民用壬午江南行臺劾平章政事嘉瑄詐言家貧冒受賜貨物折鈔二萬錠且其人素行無一善可稱魏國公尊爵也豈宜授之請追奪為宜制可癸未尚書省臣言古者設官分職各有攸司方今地大民衆事益繁冗若使省臣總挈綱領庶官各盡厥職其事豈有不治頃歲省務壅塞朝夕惟署押文案事皆廢弛天裁民困職此之由自今以始

省部一切皆令從宜處置大事或須上請得旨即行用成至治上順天道下安民心又言國家地廣民衆古所未有累朝格例前後不一執法之吏輕重任意請自太祖以來所行政令九千餘條刪除繁冗使歸於一編為定制並從之以大都城南建佛寺立行工部領行工部事三人行工部尚書二人仍令尚書右丞相托克托兼領之丙戌車駕至大都戊子尚書省臣言翰林國史院先朝御容實錄皆在其中鄉置之南省今尚書省復立

倉卒不及營建請買大第徙之制可壬辰賜高唐王專  
金五千兩銀五萬兩癸巳以薪價貴勅禁權豪畜鷹犬  
之家不得占據山場聽民樵采三寶努言冀寧大同保  
定真定以五臺建寺所須皆直取於民宜免今年租稅  
從之丙申御史臺臣言頃年歲凶民疫陛下哀矜賑之  
獲濟者衆今山東大飢流民轉徙乞以本臺沒入贓鈔  
萬錠賑救之制可丁酉御史臺臣言比者近幸為人奏  
請賜江南田千二百三十頃為租五十萬石乞拘還官



從之已亥尚書省臣言今國用需中統鈔五百萬錠前者嘗借支鈔本至千六十萬三千一百餘錠今乞罷中統鈔以至大銀鈔為母至元鈔為子仍撥至元鈔本百萬錠以給國用大都立資國院秩正二品山東河東遼陽江淮湖廣川漢立泉貨監六秩正三品產銅之地立提舉司十九秩從五品尚書省臣言三宮內降之旨曩中書省奏請勿行臣等謂宜仍舊行之儻於大事有害則復奏請帝是其言又言中書之務乞以盡歸臣等至

元二十四年凡宣敕亦尚書省掌之今臣等議乞從尚書省任人而以宣敕散官委之中書從之占八國王遣其弟扎刺奴等來貢白面象伽藍木哈喇納喇蘇圖沁特穆爾桑節實哩等奏請遣人使海外諸國以圖沁張額森巴延使不憐八孫薩察古李唐徐巴延使八昔察罕額布勒津楊呼達勒阿里使占八以陝西行臺大夫大司徒實迪為左丞相行土蕃等處宣慰使都元帥甲辰尚書省言每歲芻粟費鈔五十萬錠請廢博克遜立

度支院秩二品設使同知僉院僉判各二員從之乙巳以盜多徙上都中都大都舊盜於碩達勒達額埒蘓等地耕種丁未三寶努言養豹者害民為甚有旨禁之復犯者雖貴幸亦加罪冬十月庚戌朔以皇太子為尚書令詔天下令州縣正官以九年為任詔天下又以行銅錢法詔天下辛亥皇太子言舊制百官宣敕散官皆歸中書以臣為中書令故也自今敕牒宜令尚書省給降宣命仍委中書制可丙辰約蘇言江南平垂四十年其

民止輸地稅商稅餘皆無與其富室有蔽占王民奴使  
之者動輒百千家有多至萬家者其力可知乞自今有  
歲收糧滿五萬石以上者令石輸二升於官仍質一子  
而軍之其所輸之糧移其半入京師以養衛士半留於  
彼以備凶年富國安民無善於此帝曰如約蘇言行之  
辛酉弛酒禁立酒課提舉司尚書省以錢糧繁劇增戶  
部侍郎員外郎各一員又增禮部侍郎郎中各一員凡  
言時政者屬之立太廟廩犧署設令丞各一員癸亥以

翰林學士承旨布琳尼敦為御史大夫乙丑以皇太后有疾詔天下釋大辟百人丁卯以御史大夫濟爾噶朗中書左丞相托克托尚服院使達都並知樞密院事壬申太陰犯左執法癸酉尚書省臣言比來東汰冗官之故百官俸至今未給乞如大德十年所設員數給之餘弗給從之加知樞密院事圖古勒左丞相丁丑以遼陽行尚書省平章政事哈克繖為左丞相行中書省平章政事行中書省平章政事巴圖為平章政事行中書右丞商

議中書省事和爾多卜丹為右丞行中書省左丞參議  
中書省事特哩托歡賈鈞並中書參知政事戊寅御史  
臺臣言常平倉本以益民然歲儉遽立之反害民罷之  
便又言至大銀鈔始行品目繁碎民猶未悟而又兼行  
銅錢慮有相妨又言民間拘銅器甚急弗便乞與省臣  
詳議又言歲凶乏食不宜遽弛酒禁有旨其與省臣議  
之十一月庚辰朔以徐邳連年大水百姓流離悉免今  
歲差稅增吏部郎中員外郎主事各一員令考功以行

黜陟東平濟寧薦饑免其民差稅之半下戶悉免之尚  
書省臣言比年衛士太濫率多無賴請充衛士者必廷  
見乃聽從之雲南行省言八百媳婦大徹里小徹里作  
亂威遠州谷保奪據木羅甸詔遣本省右丞索勒濟爾  
威往招諭仍令威楚道軍千五百人護送入境而索勒  
濟爾威受谷保賂金銀各三錠復進兵攻劫谷保弓弩  
亂發遂敗還匪惟敗事反傷我人陛下裁度帝曰大事  
也其速擇使復齎璽書招諭索勒濟爾威雖遇赦可嚴

鞠之甲申賜寧肅王托克托金印陞皇太子府正司為  
從二品乙酉尚書省及太常禮儀院言郊祀國之大禮  
今南郊之禮已行而未備北郊之禮尚未舉行今年冬  
至祀天南郊請以太祖皇帝配明年夏至祀地北郊以  
世祖皇帝配制可丁亥以湖廣行省左丞沙卜珠岱為  
平章政事商議樞密院事丁酉太尉尚書右丞相托克  
托監修國史己亥太陰犯右執法庚子太陰犯上相辛  
丑尚書省臣言臣等竊計國之糧儲歲費寔廣而所入



不足今歲江南頗熟欲遣使和糴恐米價暴增請以至  
大鈔二千錠分之江浙河南江西湖廣四省於來歲諸  
色應支糧者視時直予以鈔可得百萬不給則聽以各  
省錢足之制可丙午諸王布呼齊以私怨殺人當死大  
宗正伊克扎爾古齊議布呼齊貴為國族乞杖之流北  
鄙從軍從之丁未擇衛士子弟充國子學生十二月乙  
卯親饗太廟上太祖聖武皇帝尊謚廟號及光獻皇后  
尊謚又上睿宗景襄皇帝尊謚廟號及莊聖皇后尊謚

執事者人陞散階一等賜太廟禮樂戶鈔帛有差和琳  
省右丞相太師伊徹察喇言臣與哈喇哈斯達爾罕共  
事時錢穀必與臣議自哈喇哈斯沒凡出入不復闕聞  
予奪失當而右丞囊嘉特反相凌侮輒託故赴京師有  
旨其鎖囊嘉特詣和琳鞠之武昌婦人劉氏詣御史臺  
訴三寶努奪其所進亡宋玉璽一金椅一夜明珠二奉  
旨令尚書省臣及御史中丞冀德方伊克扎爾古齊拜  
特穆爾中政使綽奇等雜問劉氏稱故翟萬戶妻三寶

努謫武昌時與劉往來及三寶努貴劉託以追逃婢  
來京師謁三寶努於其家不答入其西廊見榻上有逃  
婢所竊寶鞍及其手縫錦帕以問三寶努又不答忿恨  
而出即求書狀人喬瑜為狀乃因尹榮往見察院吏李  
節入訴於臺獄成以劉氏為妄有旨斬喬瑜笞李節杖  
劉氏及尹榮歸之原籍丙辰併中書省左右司遣使往  
諸路分揀逋負合徵者徵之合免者免之庚申太陰犯  
參尚書省臣言鹽價每引宜增為至大銀鈔四兩廣西

如故其煮鹽工本請增為至大銀鈔四錢制可辛酉申  
禁漢人執弓矢兵仗壬戌陽曲縣地震有聲如雷封西  
僧瑪爾布允則為寧國公賜金印丁丑詔增百官俸定  
流官封贈等第應封贈者或使遠死節臨陣死事於見  
授散官上加之若六品七品死節死事者驗事特贈官  
封贈內外百官三品以上者許請謚凡請謚者許其家  
具本官平日勲勞政績德業藝能經由所在官司保勘  
與本家所供相同轉申吏部考覆呈都省都省準擬令

太常禮儀院驗事蹟定謚若勲戚大臣奉旨賜謚者不在此例

三年春正月癸未省中書官吏自客省使而下一百八十一員賜諸王訥默古哩等鈔萬二千錠賜宣徽院使哲古訥所隸酒人鈔萬五百八十八錠乙酉特授李孟榮祿大夫平章政事集賢大學士同知徽政院事丁亥白虹貫日戊子禁近侍諸人外增課額及進他物有妨經制營五臺寺役工匠千四百人軍三千五百人已丑

以耨埒參議尚書省事庚寅立司裡監秩正三品掌巫覡  
以丞相哩日領之辛卯立皇后鴻吉哩氏遣托克托攝  
太尉持節授玉冊玉寶壬辰陞中政院為從一品癸  
巳立中瑞司秩正三品掌皇后寶甲午太陰犯右執法  
乙未定稅課法諸色課程並係大德十一年考較定舊  
額原增總為正額折至元鈔作數自至大三年為始恢  
辦餘止以十分為率增及三分以上為下酬五分以上  
為中酬七分以上為上酬增及九分為最不及三分為

殿所設資品官員以二周歲為滿定稅課官等第萬錠  
之上設正提舉同提舉副提舉各一員一千錠之上設  
提領大使副使各二員五百錠之上設提領大使副使  
各一員一百錠之上設大使副使各一員丙申立資國  
院泉貨監命以歷代銅錢與至大錢相叅行用復立廣  
平順德路鐵冶都提舉司戊戌詔湖廣行省招諭叛人  
上思州知州黃勝許辛丑降詔招諭大徹里小徹里樞  
密院臣言湖廣省乘西帶蠻阿馬等連結萬人入寇已

遣萬戶伊喇薩納領軍千人及思播土兵併力討捕臣等議事勢緩急地里要害薩納備知乞聽其便宜調遣制可壬寅詔諭八百媳婦遣雲南行省右丞索勒濟爾威招撫之癸卯改太子少詹事為副詹事乙巳令中書省官吏如安圖居中書時例存設其已汰者尚書省遷敘省樞密院官存知樞密院七員同知樞密院事二員樞密副使二員僉樞密院事二員同僉樞密院事一員增御史臺官二員御史大夫御史中丞侍御史治書侍



御史各二員省通政院官六員存十二員汰廣武喀喇  
衛軍非其種者還之原籍凡隸諸王阿濟格呼魯蘇及  
迤南特默齊者令樞密院遣人即其處叅定為籍去歲  
朝會諸王拜特穆爾阿拉克特穆爾並賜金二百五十  
兩銀一千兩鈔四百錠丙午詔令知樞密院事達都僉  
院哈喇哈斯復職丁未立右衛阿蘇親軍都指揮使司  
秩正三品二月庚戌以皇后受冊遣官告謝太廟辛亥  
熒惑犯月星賜鷹坊巴蘓呼金百兩銀五百兩己未浚

會通河給鈔四千八百錠糧二萬一千石以募民命河

南平章政事塔斯哈雅董其役遣商議尚書省事劉楫  
整治鈔法增大都警巡院二分治四隅壬戌太陰犯左  
執法甲子以上皇太后尊號告祀南郊乙丑復以僉樞  
密院事賈鈞為中書叅知政事尚書省臣言官階差等  
已有定制近奉聖旨懿旨令旨要索官階者率多躡等  
願依世祖皇帝舊制次第給之制可丁卯尚書省臣言  
昔至元鈔初行即以中統鈔本供億及銷其板今即行

至大銀鈔乞以至元鈔輸萬億庫銷毀其板止以至大鈔與銅錢相權通行為便又言今夏朝會上都供億請先發鈔百萬錠以往並從之楚王伊克圖所隸戶貧乏以米萬石鈔六千錠賑之已已寧王庫庫楚謀為不軌越王圖喇子喇特納實哩許助力事覺庫庫楚下獄賜其妻諤勒哲死竄喇特納實哩及其祖母母妻於拜特穆爾所以輝和爾僧特哩等二十四人同謀或知謀不首並磔於市鞠其獄者並陞秩二等賞伊克圖金千兩

銀七千五百兩三寶努賜號達爾罕以庫庫楚食邑清  
州賜之自達嚕噶齊而下並聽舉用辛未多爾濟噶加  
錄軍國重事賜故中書右丞相塔喇海妻伊爾根金七百  
五十兩銀一千五百兩鈔四百錠壬申約蘇為尚書左  
丞相駙馬都尉封齊國公癸酉以左丞相行中書省平  
章政事哈克繖商議遼陽行省事乙亥太白犯月星以  
上皇太后尊號告太廟三月己卯朔樞密院臣言國家  
設官都省治金穀樞密治軍旅各有定制今尚書省弗

遵成憲易置本院官令依大德十年員數聞奏臣等議以特穆爾布哈托爾濟延綽和爾伊蘇托克托額爾吉納圖卜布哈達都知樞密院事薩題勒密實史弼同知樞密院事吳元珪樞密副使塔噶呼為副樞有旨令樞密院如舊制設官十七員乙酉以知樞密院事濟爾噶朗為陝西行尚書省平章政事遣刑部尚書瑪爾往甘肅和市羊馬分賚諸王訥默古哩蒙古軍給鈔七萬錠庚寅太陰犯氐尚書省臣言昔世祖有旨以叛王海

都分地五戶絲為幣帛俟彼來降賜之藏二十餘年今  
其子徹伯爾向慕德化歸覲闕廷請以賜之帝曰世祖  
謀慮深遠若是待諸王朝會頒賞既畢卿等備述其故  
然後與之使彼知愧辛卯發喀喇軍屯田永平官給之  
牛壬辰車駕幸上都立興聖宮章慶使司秩正二品丙  
申太陰犯南斗丁未太白犯井夏四月己酉興聖宮鷹  
坊等戶四千分處遼陽建萬戶府以統之容米洞官田  
墨糾合蠻酋殺千戶及戍卒八十餘人俘掠良民改永

順保靖南渭安撫司為永順等處軍民安撫司以安撫  
副使梓材為使往招之賜高麗國王王章功臣號改封  
瀋王改大承華普慶寺總管府為崇祥監庚戌以鈔九  
千百五十八錠有奇市耕牛農具給直沽酸棗林屯田  
軍戊辰太白晝見己巳立齊哩克昆諸色人匠都總管  
府秩正三品提舉司二分治大都秩正五品江浙等處  
財賦提舉司秩從五品瑞州等路營民都提舉司秩從  
四品並隸章慶使司辛未賜角觥者阿里銀千兩鈔四

百錠丙子立管領軍匠千戶所秩正五品割左都威衛  
軍匠八百隸之備興聖宮營繕增國子生為三百員靈  
壽平陰二縣雨雹鹽山寧津堂邑在平陽穀高唐禹城  
等縣蝗五月甲申封諸王諤勒哲為衛王癸巳東平饑  
賑米五千石乙未加尚書參知政事王巖大司徒是月  
合肥舒城歷陽蒙城霍邱懷寧等縣蝗六月丁未朔詔  
太尉尚書右丞相托克托太保尚書左丞相三寶努總  
治百司庶務並從尚書奏行戊申省上都留守司官七



員以行中書右丞和爾多卜丹為中書右丞己酉立上  
都中都等處銀冶提舉司秩正四品尚書省臣言巴圖  
魯斯云雲州朝河等處產銀令往試之得銀六百五十  
兩詔立提舉司以巴圖魯斯為達嚕噶齊庚戌立規運  
都總管府秩正三品領大崇恩福元寺錢糧置提舉司  
資用庫大益倉隸之乙卯太陰犯氐和琳省言貧民自  
迤北來者四年之間糜粟六十萬石鈔四萬餘錠魚網  
三千農具二萬詔尚書樞密差官與和琳省臣覈實給

賜農具田種俾自耕食續至者戶以四口為率給之粟  
丁巳敕今歲諸王妃主朝會頒賚一如至大元年例甲  
子以太子詹事鄂齊爾為中書左丞集賢使領典醫監  
事戊辰遣使詣道審決重囚賜太師淇陽王伊徹察喇  
清州民戶萬七千九百一十九安吉王奇塔特布濟克  
安吉州民戶五百壬申以西北諸王徹伯爾等來朝告  
祀太廟賜托克托三寶努珠衣封三寶努為楚國公以  
常州路為分地乙亥陞晉王延慶司秩正二品襄陽峽

州路荆門州大水山崩壞官廨民居二萬一千八百二十九間死者三千四百六十六人汝州大水死者九十二人六安州大水死者五十二人沂州莒州兗州諸縣水沒民田威州沼水肥鄉鷄澤等縣旱秋七月戊寅太陰犯右執法己卯太陰犯上相庚辰封皇伯晉王長女布達實哩為韓國長公主丙戌循州大水漂廬舍二百四十四間死者四十三人發米賑之庚寅罷青海伊克扎爾古齊定王永和爾乞如例設王府官屬六員從之

癸巳給親民長吏考功印厯令監治官歲終驗其行蹟  
書而上之廉訪司御史臺尚書禮部考校以為陞黜增  
尚書省客省使副各一員直省舍人十四員立河南打  
捕鷹坊魚課都提舉司秩正四品乙未中都立光祿寺  
丁酉汜水長林當陽夷陵宜城遠安諸縣水令尚書省  
賑恤之己亥禁權要商販挾聖旨懿旨令旨阻礙會通  
河民船者壬寅詔禁近侍奏降御香及諸王駙馬降香  
者磁州威州諸縣旱蝗八月丁未以江浙行尚書省左

丞相呼喇珠遙授中書右丞相哩日並為御史大夫詔諭中外甲寅白虹貫日陞尚服院從一品丙辰以行用銅錢詔諭中外甲子獵於茂諾爾之地己巳以諸王哲伯特穆爾貧乏仍以西涼府田賜之尚書省臣言今歲頒賚已多凡各位下奉聖旨懿旨令旨賜財物者請分汰有旨卿等但具名以進朕自分汰之汴梁懷孟衛輝彰德歸德汝寧南陽河南等路蝗九月己卯平伐蠻酋不老丁遣其姪與甥十人來降陞平伐等處蠻夷軍民

安撫司同知陳思誠為安撫使佩金虎符御史臺臣言江浙省丞相達實密於天壽節日毆其平章政事布呼濟事屬不敬詔遣使詰問之內郡饑詔尚書省如例賑恤辛巳太陰犯建星立宣慰司都元帥府於察汗諾爾之地丙戌車駕還大都保巴遙授平章政事辛卯太陰犯天廩壬辰皇太子言司徒劉夔乘驛省親江南大擾平民二年不歸詔罷之庚子以潭州隸中宮上都民饑遣刑部尚書斯多卜丹發粟萬石下其價賑糶之壬寅

敕諸司官濫設者毋給月俸詔諭三寶努等去歲中書省奏諸司官員遵大德十年定制濫者汰之今聞員冗如故有不以聞而徑之任者有旨不奏而擅令之任及之任者並逮捕之朕不輕釋冬十月甲辰朔太白經天丙午太白犯左執法三寶努及司徒田忠良等言曩奉旨舉行南郊配位從祀北郊方丘朝日夕月典禮臣等議欲祀北郊必先南郊今歲冬至祀圜丘尊太祖皇帝配享來歲夏至祀方丘尊世祖皇帝配享春秋朝日夕

月寔合祀典有旨所用儀物其令有司速備之又言太廟祠祭故用瓦尊乞代以銀從之戊申帝率皇太子諸王羣臣朝興聖宮上皇太后尊號冊寶曰儀天興聖慈仁昭懿壽元皇太后庚戌恭謝太廟癸丑熒惑犯亢甲寅敕諭中外民戶託名諸王妃主貴近臣僚規避差徭已嘗禁止自今違者俾充軍驛及築城中都郡縣官不覺察者罷職封僧琳沁策喇實為文國公賜以金印御史臺臣言江浙省平章烏瑪喇遣人從使臣厲智密昂



枉道馳驛取贓吏紹興獄中釋之敕臺臣遣官往鞫毋徇私情山東徐邳等處水旱以御史臺沒入贓鈔四十餘錠賑之丁巳尚書省臣言宣徽院廩給日增儲待雖廣亦不能給宜加分減帝曰比見後宮飲膳與朕無異有是理耶其令博迪蘇與宣徽院官覈實分減之庚申敕尚書省事繁重諸司有才識明達者並從尚書省選任樞密院御史臺及諸有司毋輒奏用違者論罪其或私意請托罷之不一敘辛酉以皇太后受尊號赦天下大

都上都中都比之他郡供給繁擾與免至大三年秋稅其餘去處今歲被災人戶曾經體覆依上蠲免內外不急之役截日停罷至大二年已前民間負欠差稅課程並行蠲免庫庫楚餘黨未發覺者並原其罪隨處官民田土各有所屬諸人勿得陳獻三寶努言省部官不肯勤恪署事敕自今晨集暮退苟或怠弛不必以聞便宜罪之其到任或一再月辭以病者杖罷不敘又言故丞相和爾果斯時叅議府左右司斷事官六部官日具一

膳不然則抱饑而還稽誤公事今則無以為資乞各賜鈔二百錠規運取其息錢以為食制可丁卯封諸王舒巴勒子滿濟勒噶為克王壬申晉王伊蘇特穆爾言世祖以張特穆爾所獻地土金銀銅冶賜臣後成宗拘收諸王所占地土民戶例輸縣官乞回賜從之仍賜鈔三千錠以賑其部貧民江浙省臣言曩者朱清張瑄海漕米歲四五十萬至百十萬時船多糧少顧直均平比歲賦斂橫出漕戶困乏逃亡者有之今歲運三百萬漕舟不

足遣人於浙東福建等處和顧百姓騷動本省左丞沙布昂言其弟哈卜齊勒及瑪哈穆特丹達堪布楊家皆有舟深知漕事乞以為海道運糧都漕萬戶府官各以已力輸運官糧萬戶千戶如軍官例承襲寬恤漕戶增給顧直庶有成效尚書省以聞請以瑪哈穆特丹達為遙授右丞海外諸蕃宣慰使都元帥領海道運糧都漕運萬戶府事設千戶所十每所設達嚕噶齊一千戶三副千戶二百戶四制可雲南省丞相特們德爾擅離職

赴都有旨詰問以皇太后旨貸免復職以丞相特古勒  
德爾為陝西行御史臺御史大夫詔諭陝西四川雲南  
甘肅詔諭大司農司勸課農桑十一月甲戌朔太白犯  
亢戊寅濟寧東平等路饑免曾經賑恤諸戶今歲差稅  
其未經賑恤者量減其半詔諭哩日移文尚書省凡憲  
臺除官事後勿與庚辰河南水死者給楫漂廬舍者給  
鈔驗口賑糧兩月免今年租賦停逋責辛巳尚書省臣  
言今歲已印至大鈔本一百萬錠乞增二十萬錠及銅

錢兼行以備侍衛及鷹坊急有所須又言上都中都銀  
冶提舉司達魯噶齊巴圖魯斯去歲輸銀四千二百五  
十兩今秋復輸三千五百兩且言復得新礦銀當增辦  
乞加授嘉議大夫並從之加托克托太師錄軍國重事  
封義國公壬午改大崇恩福元寺規運總管府為隆禧  
院秩從二品丁亥太陰犯畢戊子改皇太子妃齊哩克  
昆都總管府為典內司以益都寧海等處連歲饑罷鷹  
坊縱獵其餘獵地並令禁約以俟秋成尚書省臣言雲

南首臨安大理等處宣慰司麗江宣撫司及晉定路所  
隸部曲連結蠻寇殺掠良民諭之不服且方調兵討八  
百媳婦軍力消耗今擬蒙古軍人給馬一漢軍十人給  
馬二計直與之乞賜鈔三萬錠又言四川行省紹慶路  
所隸容米洞田墨連結諸蠻攻劫麻寮等寨方調兵討  
捕遣千戶塔琳往諭田墨施什用等來降宜立黃沙寨  
以田墨施什用為千戶塔珠為河東陝西等處萬戶府  
千戶所達魯噶齊廖起龍為來寧州判官田思遠為懷

德府判官賞賚遣還皆從之以朱清子虎張瑄子文龍  
往治海漕以所籍宅一區田百頃給之尚書省臣言昔  
世祖命皇子托歡為鎮南王居揚州今其子婁章出入  
導衛僭竊上儀勅遣官詣問仍以所僭儀物來上從之  
敕城中都以牛車運土令各部衛士助之限以來歲四  
月十五日畢集失期者罪其部長自願以車牛輸運者  
別賞之江浙省左丞相達實密江西省左丞相拜布哈  
來朝賜世祖宮人巴雅爾金七百五十兩銀二千五百



兩鈔六百錠丙申有事於南郊尊太祖皇帝配享昊天上帝己亥尚書省以武衛親軍都指揮使鄭阿爾斯蘭與兄鄭榮祖段叔仁等圖為不軌置獄鞫之皆誣服詔叔仁等十七人並正典刑籍沒其家十二月甲辰朔以建大崇恩福元寺竒徹勒遙授左丞庫哩劉良遙授叅知政事並領行工部事立崇輝署隸中政院戊申冀寧路地震己未諭中外應避役占籍諸王者俾充軍驛鎮南王婁章僭擬儀衛究問有驗召婁章赴闕

四年春正月癸酉朔帝不豫免朝賀大赦天下庚辰帝崩於玉德殿在位五年壽三十一壬午靈駕發引葬起輦谷從諸帝陵夏五月乙未文武百官額森特穆爾等上尊諡曰仁惠宣孝皇帝廟號武宗國語曰庫魯克皇帝是日請諡南郊閏七月丙午祔於太廟武宗當富有之大業慨然欲創治改法而有為故其封爵太盛而遙授之官衆錫賚太隆而泛賞之恩溥至元大德之政於是稍有變更云

元史卷二十三

元史卷二十三考證

武宗本紀至大二年正月庚寅越王圖喇有罪賜死

案元典章圖喇獲罪之事載于正月乙未與此互異  
二年九月頒行至大鈔 案元鈔法至是凡三變大抵  
至元鈔五倍于中統鈔至大鈔又五倍于至元鈔未  
及期年仁宗即位即罷銀鈔而中統至元二鈔終元  
之世蓋常行焉



欽定四庫全書薈要卷六千四百三 史部

元史卷二十四

明翰林學士亞中大夫知制誥兼修國史宋濂等修

本紀第二十四

仁宗一

仁宗聖文欽孝皇帝諱阿裕爾巴里巴特喇順宗次子  
武宗之弟母曰與聖太后鴻吉哩氏至元二十二年三  
月丙子生大德九年冬十月成宗不豫中宮秉政詔帝

與太后出居懷州十年冬十二月至懷州所過郡縣供  
帳華侈悉令撤去嚴飭扈從毋擾於民且諭僉事王毅  
察而言之民皆感悅十一年春正月成宗崩時武宗為  
懷寧王總兵北邊戊子帝與太后聞哀奔赴庚寅至衛  
輝經比干墓顧謂左右曰紂內荒於色毒痛四海比干  
諫紂剗其心遂失天下今祠比干於墓為後世勸至漳  
河值大風雪田叟有以盂粥進者近侍卻不受帝曰昔  
漢光武嘗為寇兵所迫食豆粥大丈夫不備嘗艱阻往往

不知稼穡艱難以致驕惰命取食之賜粳綾一匹慰遣之行次邯鄲諭縣官曰吾慮衛士不法胥吏科斂重為民困乃命王傅巡行察之二月辛亥至大都與太后入內哭盡哀復出居舊邸日朝夕入哭奠左丞相阿固岱等潛謀推皇后巴約特氏稱制安西王阿南達輔之時右丞相哈喇哈斯達爾罕稱疾守宿掖門凡三月密持其機陽許之夜遣人啓帝曰懷寧王遠不能猝至恐變生不測當先事而發三月丙辰帝率衛士入內召阿固



公等責以亂祖宗家法命執之鞠問辭服戊辰伏誅諸  
王庫庫楚伊克圖等曰今罪人斯得太子實世祖之孫  
宜早正天位帝曰王何為出此言也被惡人潛結宮壺  
搆亂我家故誅之豈欲作威覬望神器耶懷寧王吾兄  
也正位為宜乃遣使迎武宗於北邊五月乙丑帝與太  
后會武宗於上都甲申武宗即位六月癸巳詔立帝為  
皇太子受金寶遣使四方旁求經籍識以玉刻印章命  
近侍掌之時有進大學衍義者命詹事王約等節而譯

之帝曰治天下此一書足矣因命與圖象孝經列女傳並刊行賜臣下十一月戊寅受玉冊領中書省樞密院至大元年七月帝諭詹事庫春曰汝舊事吾其與同僚協議務遵法度凡世祖所未嘗行及典故所無者慎勿行二年八月立尚書省詔太子兼尚書令戒飭百官有司振紀綱重名器夙夜以赴事功詹事院臣啓金州獻瑟瑟洞請遣使采之帝曰所寶惟賢瑟瑟何用焉若此者後勿復聞先是近侍言賈人有售美珠者帝曰吾服

御雅不喜飾以珠璣生民膏血不可輕耗汝等當廣進  
賢才以恭儉愛人相規不可以奢靡蠹財相導言者慙  
而退淮東宣慰使實都獻王觀音七寶帽頂寶帶寶鞍  
卻之戒諭如初詹事王約啓事二宦者侍側帝問自古  
宦官壞人家國有諸約對曰宦官善惡皆有之但恐處  
置失宜耳帝然之九月河間等路獻嘉禾有異畝同穎  
及一莖數穗者命集賢學士趙孟頫繪圖藏諸祕書四  
年春正月庚辰武宗崩壬午罷尚書省以丞相托克托

三寶努平章約蘇右丞保巴左丞益克特穆爾參政王  
黑變亂舊章流毒百姓命中書右丞相塔斯布哈知樞  
密院事特穆爾布哈等參鞫丙戌托克托三寶努約蘇  
保巴王黑伏誅益克特穆爾杖流海南壬辰日赤如赭  
罷城中都召世祖朝諳知政務素有聲望老臣平章程  
鵬飛董士選太子少傅李謙少保張律右丞陳天祥尚  
文劉正左丞郝天挺中丞董士珍太子賓客蕭剡參政  
劉敏中王思廉韓從益侍御趙君信廉訪使程鉅夫杭

州路達噶齊阿哈瑪特詣闕同議庶務甲午宥阿附  
托克托等左右司六部官罪乙未禁百官役軍人營造  
及守護私第丁酉以雲南行中書省左丞相特們德爾  
為中書右丞相太子詹事鄂勒哲集賢大學士李孟並  
平章政事戊戌以塔斯布哈及徽政院使實沙並為御  
史大夫己亥改行尚書省為行中書省庚子減價糶京  
倉米日千石以賑貧民停各處營造罷廣武喀喇衛追  
還印符驛券璽書及其萬戶等官宣敕辛丑以達實特

穆爾知樞密院事壬寅禁鷹坊馳驛擾民敕中書凡傳  
旨非親奉者勿行以諸王朝會普賜金三萬九千六百  
五十兩銀百八十四萬九千五十兩鈔二十二萬三千  
二百七十九錠幣帛四十七萬二千四百八十八匹二  
月復玉宸樂院為儀鳳司改延慶司為都功德使司乙  
巳命和琳江浙行省依前設左丞相餘省唯置平章二  
員遙授職事勿與戊申罷運江南所印佛經辛亥禁諸  
王駙馬權豪擅據山場聽民樵採罷阿喇卜丹買賣浙

鹽供中政院食羊禁宣政院違制度僧甲寅遣使檢覈  
蘇爾約蘇布哈所獻河南荒田司徒蕭珍以城中都徼  
功毒民命追奪其符印令百司禁錮之還中都所占民  
田罷江南行通政院行宣政院甲子太陰犯填星陞典  
內司為典內院秩從三品命中書平章李孟領國子監  
學諭曰學校人材所自出卿等宜數詣國學課諸生勉  
其德業敕諸王駙馬戶在縉山懷來永興縣者與民均  
服徭役諸司擅奏除官者毋給宣敕御史臺臣言白雲

宗總攝所統江南為僧之有髮者不養父母避役損民  
乞追收所受璽書銀印勒還民籍從之罷福建繡匠河  
南魚課兩提舉司省宣徽院參議斷事官丙寅監察御  
史言比者尚書省臣蠹國亂政已正典刑其餘黨附之  
徒布在百司亦須次第沙汰今中書奏用博囉特穆爾  
為陝西平章烏瑪喇為江浙平章奇爾濟蘇為甘肅平  
章達實特穆爾為河南參政烏遜為江浙參政各人前  
任皆受重贓或挾勢害民咸乞罷黜制曰可丁卯命西



番僧非奉璽書驛券及無西蕃宣慰司文牒者勿輒至  
京師仍戒黃河津吏驗問禁止罷總統所及各處僧錄  
僧正都綱司凡僧人訴訟悉歸有司罷仁虞院復置鷹  
坊總管府庚午命廣西靜江融州軍民官鎮守三載無  
虞者民官減一資軍官陞一階著為令思州軍民宣撫  
司招諭官唐銓以洞蠻楊正思等五人來朝賜金帛有  
差立淮安忠武王巴延祠於杭州仍給田以供祀事是  
月帝謂侍臣曰郡縣官有善有惡其命臺官選正直之

人為廉訪司官而體察之果有廉能愛民者不次擢用  
則小人自知激厲矣旌表漳州長泰縣民王初應孝行  
三月庚辰召前樞密副使吳元珪左丞貝降額卜德呼  
勒至京同諸老臣議事丙戌太陰犯太微上相罷五臺  
行工部己丑命母赦十惡大逆等罪復典瑞院為典瑞  
監庚寅即皇帝位於大明殿受諸王百官朝賀詔曰惟  
昔先帝事皇太后撫朕眇躬孝友天至由朕得託順考  
遺體重以母弟之嫡加有削平內難之功於其踐阼曾

未踰月授以皇太子寶領中書令樞密使百揆機務聽  
所總裁於今年先帝奄棄天下勲戚元老咸謂大寶  
之承既有成命非與前聖賓天而始徵集宗親議所宜  
立者比當稽周漢晉唐故事正位宸極朕以國恤方新  
誠有未忍是用經時今則上奉皇太后勉進之命下徇  
諸王勸戴之勤三月十八日於大都大明殿即皇帝位  
凡尚書省誤國之臣先已伏誅同惡之徒亦已放殛百  
司庶政悉歸中書命丞相特們德爾平章政事李道復

等從新拯治可大赦天下敢以赦前事相告言者罪以  
其罪諸衙門及近侍人等毋隔越中書奏事諸上書陳  
言者量加旌擢其僥倖獻地土并山場窰冶及中寶之  
人並禁止之諸王駙馬經過州郡不得非理需索應和  
顧和買隨即給價毋困吾民辛卯禁民間製金箔銷金  
織金以御史中丞李士英為中書左丞壬辰發京倉米  
減價以賑貧民丁酉命伊徹察喇依前太師宣徽使特  
爾格為太傅集賢大學士察罕為太保敕百司改陞品

級者悉復至元舊制己亥增置左翼右翼指揮各一員  
寧夏路地震是月帝諭省臣曰卿等哀集中統至元以  
來條章擇曉法律老臣斟酌重輕折衷歸一頒行天下  
俾有司遵行則抵罪者庶無冤抑又諭太府監臣曰財  
用足則可養萬民給軍旅自今雖一繒之微不言於朕  
毋輒與人以陝西行尚書省左丞額卜德呼勒為中書  
右丞昭文館大學士察罕參知政事中書平章政事知  
樞密院事綽和爾欽察親軍都指揮使托和齊巴圖爾

中書右丞相知樞密院事特穆爾布哈錄軍國重事知  
樞密院事伊蘇知樞密院事兼山東河北蒙古軍都萬  
戶額森特穆爾遙授左丞相仁虞院使額爾吉太子詹  
事伊嚕特穆爾並知樞密院事賜大都路民年九十者  
二千三百三十一人人帛二匹八十者八千三百三十  
一人人帛一匹夏四月壬寅朔詔分汰宿衛士漢人高  
麗南人冒入者還元籍癸卯崇星於回回司天臺以即  
位恩賜太師太傅太保人金五十兩銀三百五十兩衣

四襲行省臣預朝會者賞銀有差丁未以太子少保張律為江浙平章戒之曰以汝先朝舊人故命汝往民為邦本無民何以為國汝其上體朕心下愛斯民戊申以即位告天地於南郊庚戌拘收下番將校不典兵者虎符銀牌癸丑詔路府州縣官三年為滿罷典醫監甲寅太陰犯亢熒惑犯壘壁陣丙辰詔諭宣徽使伊拉齊諸蒙古民有貧乏者發廩濟之丁巳罷中政院戊午以即位告於太廟辛酉敕國子監師儒之職有才德者不拘

品級雖布衣亦選用癸亥敕諸使臣非軍務急速者毋  
給金字圓牌定四宿衛士歲賜鈔二十四萬二百五錠  
罷中都留守司復置隆興路總管府凡創置司存悉罷  
之乙丑封知樞密院事特穆爾布哈為宣寧王賜銀印  
丁卯詔曰我世祖皇帝參酌古今立中統至元鈔法天  
下流行公私蒙利五十年於茲矣比者尚書省不究利  
病輒意變更既創至大銀鈔又鑄大元至大銅錢鈔以  
倍數太多輕重失宜錢以鼓鑄弗給新舊恣用曾未再



期其弊滋甚爰咨廷議允協輿言皆願變通以復舊制其罷資國院及各處泉貨監提舉司買賣銅器聽民自便應尚書省已發各處至大鈔本及至大銅錢截日封貯民間行使者赴行用庫倒換仍免大都上都隆興差稅三年命中書省賑濟甘肅過川軍罷僧道伊嚕勒昆達實密頭陀白雲宗諸司封親王德勒格爾布哈為湘寧王賜金印食湘鄉州寧鄉縣六萬五千戶拘還甘肅陝西遼陽省臣所佩虎符禁鷹坊擾民罷通政院以

其事歸兵部增置尚書員外郎各一員罷回回哈達司屬帝御便殿李孟進曰陛下御極物價頓減方知聖人神化之速敢以為賀帝感然曰卿等能盡力贊襄使兆民乂安庶幾天心克享至於秋成尚未敢必今朕踐阼曾未踰月寧有物價頓減之理朕托卿甚重茲言非所賴也孟愧謝帝諭集賢學士和塔拉都哩默色曰向召老臣十人所言治政汝其詳譯以進仍諭中書悉心舉行南陽等處風雹五月壬申以宦者塔舒爾為利用監

卿癸酉八百媳婦蠻與大小徹里蠻寇邊命雲南王及

右丞阿固岱以兵討之改封乳母夫壽國公楊德榮為

雲國公丙子命翰林國史院纂修先帝實錄及累朝皇

后功臣列傳俾百司悉上事蹟丁丑禁母以毒藥釀酒

庚辰敕中書省裁省冗司置高昌王傅復度支院為監

罷泉府司長信院司裡監辛巳賜大長公主僧格喇實

鈔一萬錠壬午制定翰林國史院各五員學士侍讀

侍講直學士各二員拘諸王駙馬及有司驛券自今遣

使悉從中書省給降置祥和署掌伶人金齒諸國獻馴  
象癸未太陰犯氐賜國師班迪達鈔萬錠以建寺於舊  
城戊子羅鬼蠻來獻方物甲午復太常禮儀院為太常  
寺是月禁民捕駕鵝六月癸卯敕宣政院凡西番軍務  
必移文樞密院同議以聞吐蕃犯永福鎮敕宣政院與  
樞密院遣兵討之乙巳命侍臣咨訪內外才堪佐國者  
悉以名聞仍戒敕諸王恪恭乃職丙午以內侍楊光祖  
為祕書卿譚振宗為武備卿開居仁為尚乘卿並授宏

文館學士置湘寧王德勒格爾布哈王傳丁未太陰犯

太微東垣上將己酉詔存恤軍人庚戌太陰犯氏壬子

敕甘肅省給過川軍牛種農器令屯田癸丑復太府院

為太府監省上郝兵馬指揮為五員甲寅封伊實丹為

懷仁郡王賜銀印丁巳敕翰林國史院春秋祭太祖太

宗睿宗御容歲以為常命和琳行省右丞巴喇瑪索和

爾經理青海屯田大同路宣寧縣民家產犢而死頗類

麒麟車載以獻左右曰古所謂瑞物也帝曰五穀豐熟

百姓安業乃為瑞也已未復置長信寺封樞密使博囉  
為澤國公庚申敕自今諸司白事須殿中侍御史侍側  
癸亥賜晉王伊遜特穆爾鈔五千錠幣帛各二千匹太  
尉布哈金百兩復雲州銀場提舉司置儀鸞局秩皆五  
品甲子請大行皇帝諡於南郊上尊諡曰仁惠宣孝皇  
帝廟號武宗丙寅拘收泉府司元給諸商販鹽書丁卯  
罷扎哈齊巴勒噶遜所造上供酒戊辰敕諸王朝會後  
至者如例給賜己巳衛王阿穆爾克入見帝諭省臣曰

朕與阿穆爾克同父異母朕不撫育彼將誰賴其賜鈔  
二萬錠他勿援例帝覽貞觀政要諭翰林學士額哩音  
特穆爾曰此書有益國家其譯以國語刊行俾蒙古色  
目人誦習濟寧東平歸德高唐徐邳諸州水給鈔  
賑之河間陝西諸縣水旱命有司賑之仍免其今  
年租諸王達爾瑪吉爾迪遣使進馴象秋七月辛未朔  
拘還遼陽省官提調諸事圖符璽書驛券裁減虎育司  
職員賜上都宿衛士貧乏者鈔十三萬九千錠丁丑鞏

昌寧遠縣暴雨山土流涌敕內外軍官並覃官一等癸  
未甘州地震大風有聲如雷以朝會恩賜諸王圖們金  
百五十兩銀五千二百五十兩幣帛三千匹乙酉賜湘  
寧王德勒格爾布哈所部鈔三萬二千錠癸巳太陰掩  
畢甲午置經正監掌蒙古軍牧地秩正三品官五員丁  
酉太陰犯鬼距星己亥詔諭省臣曰朕前戒近侍毋輒  
以文記傳旨中書自今敢有犯者不須奏聞直捕其人  
付刑部究治敕御史臺臣選更事老成者為監察御史



超授中散大夫典內院使博碩榮祿大夫是月江陵屬  
縣水民死者衆太原河間真定順德彰德大名廣平等  
路德濮恩道等州霖雨傷稼大寧等路隕霜敕有司賑  
恤閏七月辛丑命國子祭酒劉賡詣曲阜以太牢祠孔  
子甲辰車駕將還大都太后以秋稼方盛勿令鷹坊馳  
入衛士先往庶免官稼擾民敕禁止之樞密院奏居庸  
關古道四十有三軍吏防守之處僅十有三舊置千戶  
位輕責重請置隆鎮萬戶府俾嚴守備制曰可崇五星

於司天臺以故魯王達幹巴勒適子阿哩雅實哩襲其  
封爵分地乙巳以朝會恩賜伊徹察喇綽和爾金二百  
兩銀二千八百兩幣帛有差丙午奉武宗神主祔於太  
廟戊申封李益秦國公命琳沁策喇實為司徒己丑吐  
番寇禮店文州命總帥琳沁等討之辛亥以西僧藏布  
班巴爾為國師賜玉印戊午復置司裡監己未詔省臣  
曰國子學世祖皇帝深所注意如平章博果密等皆蒙  
古人而教以成才朕今親定國子生額為三百人仍增

陪堂生二十人通一經者以次補伴讀著為定式敕軍  
官七十致仕始聽子弟承襲其有未老即託疾引年令  
幼弱子弟襲職者除名不敘其巧計求遷者以違制論  
壬戌命賑卹嶺北流民上都立通政院領蒙古諸驛秩  
正二品甲子寧夏地震乙丑魯國大長公主僧格喇實  
進號皇姊大長公主遣使招諭黑水白水等蠻十二萬  
餘戶來降丙寅太陰犯軒轅賜諸王阿布哈等金二百  
兩銀七百五十兩鈔一萬三千六百三十錠幣帛各有

差丁卯鄂勒哲李孟等言方今進用儒者而老成日凋  
謝四方儒士成才者請擢任國學翰林祕書太常或儒  
學提舉等職俾學者有所激勸帝曰卿言是也自今勿  
限資級果才而賢雖白身亦用之敕直省舍人以其半  
給事殿庭半聽中書差遣禁醫人非選試及著籍者毋  
行醫藥大同宣寧縣雨雹積五寸苗稼盡殞八月己巳  
朔裁定京朝諸司員數並依至元三十年舊額楚王伊  
克圖所部乏食給鈔萬錠出粟五千石賑之賜環衛國

人鈔三萬錠以近侍吹喇實為戶部尚書甲戌賜皇姊大長公主鈔萬錠丙戌安南世子陳日養奉表以方物來貢敕西番軍務隸宣政院九月己亥朔遥授左丞相布哈進太尉丙午遥授湖廣平章安南國王陳益稷入見言臣自世祖朝來歸妻子皆為國人所害朝廷授以王爵又賜漢陽田五百頃俾自贍以終餘年今臣年幾七十而有司拘臣所授田就食無所帝謂省臣曰安南國王慕義來歸宜厚其賜以懷遠人其進勲爵受田如

故戊申禁民彈射飛鳥殺馬牛羊當乳者禁衛士不得  
私衣侍宴服及以質於人庚戌命樞密院閱各省軍馬  
壬子改元皇慶詔曰朕賴天地祖宗之靈纂承聖緒永  
惟治古之隆羣生咸遂國以入寧朕夙興夜寐不敢怠  
遑任賢使能興滯補闕庶其臻茲斂時五福用敷錫厥  
庶民朕之志也踰年改元厥有彝典其以至大五年為  
皇慶元年都水監卿茂巴爾斯傳旨給驛往取杭州所  
造龍舟省臣諫曰陛下踐阼誕告天下凡非宣索毋得

擅進誠取此舟有乖前詔詔止之復置中宮位下齊哩  
克昆諸色民匠打捕鷹坊都總管府秩正三品乙卯太  
陰犯畢丁巳奉太后旨以永平路歲入除經費外悉賜  
魯國大長公主給雲南王羅丹部屬馬價鈔一萬二千  
錠丙寅敕省部官勿托以宿衛廢職罷西番茶提舉司  
時江陵路水漂民居溺死十八人冬十月戊辰朔有事  
於太廟己巳敕繪武宗御容奉安大崇恩福元寺月四  
上祭辛未賜大普慶寺金千兩銀五千兩鈔萬錠西錦

綵段紗羅布帛萬端田八萬畝邸舍四百間丁丑禁諸

僧寺毋得冒侵民田辛巳罷宣政院理問僧人詞訟以

蘄縣萬戶府鎮慶元紹興沿海萬戶府鎮處州宿州萬

戶府兼鎮台州戊子省海道運糧萬戶為六員千戶為

七所特授故太師阿爾婁子穆哩庫榮祿大夫知樞密

院事辛卯罷諸王斷事官其蒙古人犯盜詐者命所隸

千戶鞠問壬辰詔收至大銀鈔敕諸衛漢軍練習武事

置羣牧監秩正三品掌興聖宮位下畜收癸巳詔置汴



梁平江等處田賦提舉司掌大承華普慶寺貨產給雲

南增戍軍鈔二萬五千錠丙申太白犯壘壁陣十一月

戊戌封司徒穆蘇為趙國公辛丑命延安鳳翔安西軍

屯田紅城者還陝西屯田教商稅官盜稅課者同職官

贓罪立乖西府以土官阿馬知府事佩金符李孟奏錢

糧為國之本世祖朝量入為出恒務撙節故倉庫充物

今每歲支鈔六百餘萬錠又土木營繕百餘處計用數

百萬錠內降旨賞賜復用三百餘萬錠北邊軍需又六

七百萬錠今帑藏見貯止十一萬餘錠若此安能周給  
自今不急浮費宜悉停罷帝納其言悉罷之辛亥諸王  
布琳尼敦等誣班布爾賁以不法詔竄布琳尼敦圖罕  
於河南伊克彙爾於揚州納琳於湖廣台納於江西巴  
勒楚納克於雲南壬子賑欽察衛糧五千七百五十三  
石甲寅太陰犯輿鬼戊午禁漢人回回術者出入諸王  
駙馬及大臣家己未以遼陽省平章政事哈薩為中書  
平章政事甲子敕增置京城米肆十所日平糶八百石

以賑貧民丙寅加徽政使羅源為大司徒賑諸軍糧七

千六十石十二月辛未增置經正監官為八員置尚牧

所秩五品掌太官羊豕封宣政會福院使溫普為秦

國公增置兵部侍郎郎中各一員庚辰太白經天復以

陝西屯田軍三千隸紅城萬戶府壬午詔曰今歲不登

民何以堪春蒐其勿令供億癸未太白經天甲申太陰

犯太微西垣上將浙西水災免漕江浙糧四分之一存

留賑濟命江西湖廣補運輸京師占城遣使奉表貢方

物庚寅申禁漢人持弓矢兵器田獵曲赦大都大辟囚  
一人并流以下罪辛卯裁宗正府官為二十八員遣官  
監視焚至大鈔壬辰太白經天敕初設邊遠官員俟到  
任方降敕牒乙未命李孟整飭國子監學中書省臣言  
世祖定立選法陞降以示激勸今官未及考或無故更  
代或躐等進階僭受國公丞相等職諸司已裁而復置  
者有之今春以內降旨除官千餘人其中欺偽豈能悉  
知壞亂選法莫此為甚帝曰凡內降旨一切勿行賜濟

王圖烈納印以和琳稅課建延慶寺詔諭安南國世子

陳日養曰惟我祖宗受天明命撫有萬方威德所加柔  
遠能迺者先皇帝龍馭上賓朕以王侯臣民不釋之  
故於至大四年三月十八日即皇帝位遵踰年改元之  
制以至大五年為皇慶元年今遣禮部尚書奈瑪台等  
齋詔往諭仍頒皇慶元年歷日一本卿其敬授人時益  
修臣職毋替爾祖事大之誠以副朕不忘柔遠之意

皇慶元年春正月庚子帝諭御史大夫塔斯布哈曰凡

大臣不法卿等劾奏毋避朕自裁之癸卯敕諸僧犯奸盜詐偽鬪訟仍令有司專治之甲辰授太師錄軍國重事知樞密院事多爾濟噶開府儀同三司嗣淇陽王戊申改隆鎮萬戶府為隆鎮衛庚戌封知樞密院事綽哈為安遠王出總北軍壬子敕軍不滿五千者勿置萬戶癸丑太陰犯太微東垣上將旌表廣州路番禺縣孝子陳韶孫戊午制諸王設王傅六員銀印其次設官四員改封濟王圖烈納為吳王賜衛王阿穆爾克慶元路定

海縣六萬五千戶加崇福使阿哩雅秦國公己未陞崇

祥監為崇祥院秩正二品壬戌陞翰林國史院秩從一

品帝諭省臣曰翰林集賢儒臣朕自選用汝等毋輒擬

進人言御史臺任重朕謂國史院尤重御史臺是一時

公論國史院實萬世公論二月丁卯朔徙大都路學所

置周宣王石鼓於國子監敕青海屯內漢軍存恤二年

庚午西北諸王額森布哈遣使貢珠寶皮幣馬駝賜鈔

一萬三千六百錠辛未改安西路為奉元路吉州路為

吉安路壬申以霸州文安縣屯田水患並決之遣使賜  
西僧金五千兩銀二萬五千兩幣帛三萬九千九百匹  
甲戌制定封贈名爵等級著為令改和琳省為嶺北省  
丙子給青海屯田牛二千賜晉王伊蘇特穆爾南康路  
戶六萬五千世祖諸王子額森特穆爾福州路福安縣  
托歡之子布達實哩福州路寧德縣和塔拉特穆爾之  
子泉州路南安縣阿雅噶齊之子邵武路光澤縣戶並  
一萬三千六百有四食其歲賦己卯置衛龍都元帥府



秩正二品以右阿蘇衛隸之八百媳婦來獻馴象二壬

午太陰犯亢封博囉為永豐郡王置德安府行用鈔庫

罷莊浪州唐古千戶所丙戌省樞密斷事官為八員庶

寅敕嶺北省賑給闕食流民敕兩淮民種荒田者如例

輸稅遣官同江西浙江省整治茶鹽法賜韓國公主布

達實哩鈔萬錠詔勉勵學校賑山東流民至河南境者

通鄴州饑賑糧兩月三月丁酉朔熒惑犯東井陞給事

中秩正三品罷諸王大臣私第營繕戊戌右丞相特們

德爾言自今左右司六部官有不盡心初則論決不悛

則黜而不敘制曰可省女直碩達勒達萬戶府冗員敕

諸王托克托所招戶其未籍者俾隸有司己亥以生日

為天壽節庚子加御史大夫和尼齊開府儀同三司罷

衛龍都元帥府壬寅太陰犯東井敕歸德亳州以憲宗

所賜布琳濟達地一千七十三頃還其子孫丙午敕北

邊使者非軍機毋給驛丁未置內正司秩正三品卿少

卿各一員戊申陞典內院秩正二品以前河南行省

平章政事塔斯哈雅為御史大夫改翰林國史院司直  
司為經歷司置經歷都事各一員置五臺寺濟民局秩  
從五品賜衛王鄂勒哲及其子金三百兩銀一千二百  
五十兩鈔三千五百錠賜汴梁路上方寺地百頃遼陽  
增置灤陽寬河驛甲寅西北諸王額森布哈等以橐駝  
方物入貢丙辰封同知徽政院事常布呼齊為趙國公  
庚申敕簡汰大明宮興聖宮宿衛甲子給北軍幣帛二  
十萬匹遣戶部尚書瑪勒經理河南屯田乙丑命河南

省建故丞相阿珠祠堂封諸王塔斯布哈為恩平王夏  
四月丁卯簡汰控鶴還本籍以都水監隸大司農寺置  
察汗諾爾捕盜司秩從七品庚午命浙東都元帥鄭祐  
同江浙軍官教練水軍辛未給鈔萬錠修香山永安寺  
趙王汝安郡告饑賑糧八百石陞保定路萬戶府為上  
萬戶癸酉車駕幸上都丙子太白晝見封郵國大長公  
主孟古台為大長公主賜金印增伊克扎爾古齊為四  
十二員壬午熒惑犯輿鬼敕皇子碩迪巴拉置四宿衛

敕僧人田除宋之舊有并世祖所賜外餘悉輸祖如制

阿蘇衛指揮諾海等冒增衛軍六百名盜支糧七千二

百石幣帛一千二百匹鈔二百八錠敕中書樞密按治

封知樞密院事穆哩庫為廣平王癸未熒惑犯積尸氣

庚寅太白經天大崇恩福元寺成置隆禧院龍興新建

縣霖雨傷禾彰德安陽縣蝗五月丙申朔以中書平章

政事哈克繼為中書左丞相江浙行省平章張律為中

書平章政事知樞密院事額森特穆爾授開府儀同三

司壬寅諸王托斯和默色以農時出獵擾民敕禁之自  
今十月方許獵改和琳路為和寧路賜諸王阿穆爾克  
鈔萬錠蘇爾蘇達勒阿爾穆蘇等各千錠以蒙古驛隸  
通政院置濮陽王托克托穆爾王傳官四員給上都灤  
陽驛馬三百匹丁未縉山行宮建涼殿己酉以西寧田  
租稅課賜大長公主孟古台賑宿衛士糧二萬石陞回  
回司天臺秩正四品彰德河南隴西電六月乙丑朔日  
有食之丁卯天雨毛己巳太陰犯天關敕李孟博選中

外才學之士任職翰林給羊馬鈔價濟嶺北甘肅戍軍  
之貧者壬申減四川鹽額五千引賜崇福寺河南官地  
百頃丁亥敕罷封贈誠左右守法度勤職業勿妄僥倖  
加官賜安遠王綽哈金百兩銀五百兩鈔千錠鞏昌河  
州等路饑免常賦二分秋七月辛丑定內正司官為六  
員禁諸王徑宣旨於各路從中都內帑金銀器歸太府  
監賜新店諸驛鈔三千八百錠充使者餼廩癸卯詔獎  
勵御史臺丙午陞大司農司秩從一品帝諭司農曰農

桑衣食之本汝等舉諳知農事者用之敕諸王錫錫部

歸晉寧路襄垣縣民田中書參政賈鈞以病請告賜鈔

三百錠給安車還鄉戊午太陰犯東井八月丁卯敕特

默齊軍羊馬牛依舊制百稅其一戊辰太白犯軒轅辛

未太陰犯填星丁丑罷司種監己卯以吏部尚書許師

敬為中書參知政事庚辰車駕至自上都壬午辰星犯

右執法置少府監隸大都留守司甲申賜諸王庫庫楚

金束帶一銀百五十兩鈔二百錠乙酉太白犯右執法



辛卯敕雲南省右丞阿固岱等領蒙古軍從雲南王討

八百媳婦蠻濱州旱民饑出利津倉米二萬石減價賑

耀寧國路涇縣水賑糧二月安南國王陳益稷來朝九

月丁酉增江浙海漕糧二十萬石戊戌罷征八百媳婦

蠻大小徹里蠻以璽書招諭之辛丑命司徒田忠良等

詣真定玉華宮祀睿宗御容八百媳婦大小徹里蠻獻

馴象及方物甲辰陞參議中書省事鄂博哈雅為參知

政事拘和卓等所佩國公司徒印丁巳太陰犯亢壬戌

瓊州黎賊嘯聚遣官招諭冬十月甲子有事於太廟改  
隆興路為興和路賜銀印雲南行省右丞色勒濟爾威  
有罪國師楚斯節巴咱爾請釋之帝斥之曰僧人宜誦  
佛書官事豈當與耶癸未以中書參知政事察罕為中  
書平章政事商議中書省事丁亥太陰犯平道戊子太  
陰犯亢翰林學士承旨伊爾齊布哈等進順宗成宗武  
宗實錄罷造船提舉司辛卯赦天下賜李孟潞州田二  
十頃十一月戊戌調汀漳畬軍代亳州等翼漢軍於本

處屯田己亥太陰犯壘壁陣甲辰捕滄州盜阿實克岱爾等擒之支解以徇丙午諭六部毋踰越中書奏事丙辰封駙馬托克托穆爾為岐王庚申賜諸王庫春和塔拉默色金百五十兩銀一千五百兩鈔三千錠幣帛有差占城國進犀象緬國王遣壻及雲南不農蠻酋長岑福來朝十二月癸亥中書平章政事李孟致仕以樞密副使張珪為中書平章政事壬申晉王伊遜特穆爾所部告饑賑鈔一萬五千錠癸酉遣使分道決囚庚辰知

樞密院事達實密罷省海道運糧萬戶一員增副萬戶  
為四員甲申熒惑填星辰星聚斗鷹坊布哈濟勒請往  
河南湖廣括取孔雀珍禽敕以擾民不允丁亥遣官祈  
雪於社稷嶽鎮海濱省臣言中書職在總挈綱維比者  
行省六部諸司應決不決者往往作疑咨呈以致文繁  
事弊詔體世祖立中書初意定擬程式以聞俾遵行之  
敕回回哈達如舊祈福凡詞訟悉歸有司仍拘還先降  
璽書戊子太陰犯熒惑己丑宗王女巴勒丹給驛取江

南田租命拘還驛券是月諸王吹丹叛

二年春正月甲午以察汗諾爾等處宣慰使布呼為御  
史大夫辛丑封前尚書右丞相奇塔特布濟克為安吉  
王丙午寧王庫庫楚薨丁未以太府卿圖古勒為中書  
右丞相戊申太陰犯三公巳未置遼陽行省儒學提舉  
司二月壬戌改典內院為中政院秩正一品甲子以皇  
后受冊寶祭告天地於南郊及太廟丁丑日赤如赭巳  
卯免徵益都饑民所貸官糧二十萬石各寺修佛事日

用羊九千四百四十枚遵舊制易以蔬食命張珪綱領  
國子學庚辰冀寧路饑禁釀酒辛巳詔以錢糧造作訴  
訟等事悉歸有司以清中書之務壬午西北諸王額森  
布哈進馬駝璞玉丁亥敕外任官應有公田而無者皆  
以至元鈔給之以乖西府隸播州宣撫司功德使琳沁  
等以佛事奏釋重囚不允帝諭左右曰回回以寶玉鬻  
於官朕思此物何足為寶唯善人乃為寶善人則百  
姓安茲國家所宜寶也三月丙申以御史中丞托歡達

爾罕為御史大夫庚子熒惑犯壘壁陣以骨寧大同大

寧四川鞏昌甘肅饑禁酒丙午冊立皇后鳩吉哩氏詔

天下丁未彗出東井壬子圖古勒言臣等職專變理去

秋至春亢旱民間乏食而又隕霜雨沙天文示變皆由

不能宣上恩澤致茲災異乞黜臣等以當天心帝曰事

豈關汝輩耶其勿復言御史中丞郝天挺上疏論時政

帝嘉納之賜西僧楚斯節巴咱爾鈔萬鈔丙辰以皇后

受冊寶遣官恭謝太廟以亢旱既久帝於宮中焚香默

禱遣官分禱諸祠甘雨大注詔敦諭勸課農桑夏四月  
甲子崇星於司天臺癸酉賜壽寧公主橐駝三十六乙  
亥車駕幸上都丙子高麗王辭位以其世子王燾為征  
東行中書省左丞相上柱國封高麗國王辛巳加御史  
大夫布呼開府儀同三司太傅壬午置中瑞司秩正四  
品甲申詔遴選賢士纂修國史乙酉御史臺臣言富人  
負緣特旨濫受官爵微政宣徽用人率多罪廢之流近  
侍託為貧乏互奏恩賞西僧以作佛事之故累釋重囚



外任之官身犯刑憲輒營求內旨以免罪諸王駙馬奇

觀臣僚土田每歲徵租亦極為擾民請革其弊制曰可

詔罷不急之役真定保定河間大寧路饑並免今年田

租十之三仍禁釀酒安南國遣使來貢方物五月辛丑

陞中書右丞額卜德呼勒為平章政事左丞巴勒托音

為右丞參知政事鄂博哈雅為左丞參議中書省事圖

勒鳴特穆爾為參知政事順德冀寧路饑辰州水賑以

米鈔仍禁釀酒檀州及獲鹿縣蝻六月己未朔京師地

震癸亥圖古勒等以災異乞賜赦黜不允丙寅京師地震辛未以參知政事許思敬綱領國子學乙亥詔諭僧俗辯訟有司及主僧同問續置土田如例輸稅丙子賜諸王昂輝金五十兩銀七百五十兩金束帶一幣帛各四十匹己卯河東廉訪使趙簡言請選方正博洽之士任翰林侍讀侍講學士講明治道以廣聖聽從之御史臺臣言比年廉訪司多不悉心奉職宜令監察御史檢覈名實而黜陟之廣海及雲南甘肅地遠遣調者憚弗

肯往乞今後加一等官之制曰可壬午命監察御史檢  
察監學官考其殿最癸未命委官簡汰衛士甲申建崇  
文閣於國子學給馬萬匹與幽王納古爾等軍士之貧  
乏者以宋儒周敦頤程顥顥弟頤張載邵雍司馬光朱  
熹張栻呂祖謙及故中書左丞許衡從祀孔子廟廷上  
都民饑出米五千石減價賑糶河決陳毫睢州開封陳  
留縣沒民田廬秋七月己丑朔歲星犯東井辛卯太白  
晝見癸巳以作佛事釋囚徒二十九人賜宣寧王特穆

爾布哈幣帛百二十匹安遠王伊實丹等各百匹保定  
真定河間民流不止命所在有司給糧兩月悉免今年  
差稅被災地並弛山澤之禁獵者毋入其境甲午置權  
茶批驗所并茶由局官乙未太白晝見庚子立長秋寺  
掌武宗皇后宮政秩三品敕衛王阿穆爾克歲賜外給  
鈔萬錠賜駙馬圖卜特穆爾金百五十兩銀七百五十  
兩鈔二千錠幣帛五十匹辛丑復立四川等處儒學提  
舉司壬寅京師地震免大寧路今歲鹽課丁未賜諸王

和拉蘇默托歡納古爾駙馬孟古岱金二百兩銀一千

二百兩鈔一千六百錠幣帛各有差已酉改淮東淮西

道宣慰司為淮東宣慰司以淮西三路隸河南省敕守

令勸課農桑勤者陞遷怠者黜降著為令丙辰太白晝

見丁巳太白經天雲州蒙古軍乏食戶給米一石興國

屬縣蝻發未賑之八月戊午朔太白晝見揚州路崇明

州大風海潮泛溢漂沒民居壬戌歲星犯東井丁卯車

駕至自上都庚午以侍御史薛居敬為中書參知政事

壬午太陰犯輿鬼九月以薩斯嘉巴為帝師癸巳以宣  
徽院使鄂勒哲知樞密院事戊申封托歡為安定王賜  
金印敕鎮江路建銀山寺勿徙寺傍瑩冢京師大旱帝  
問弭災之道翰林學士程鉅夫舉湯禱桑林事帝獎諭  
之冬十月己卯敕中書省議行科舉封博迪穆爾為安  
德王辛巳徙崑山州治於太倉昌平縣治於新店癸未  
以遼陽路之懿州隸遼陽行省復置蒙陰縣隸莒州乙  
酉旌表高州民蕭又妻趙氏貞節免其家科差十一月

壬寅敕漢人南人高麗人宿衛分司上都勿給弓矢甲  
辰行科舉詔以皇慶三年八月天下郡縣興其賢能者  
充貢有司次年二月會試京師中選者親試於廷賜及  
第出身有差帝謂侍臣曰朕所願者安百姓以圖至治  
然匪用儒士何以致此設科取士庶幾得真儒之用而  
治道可興也十二月辛酉克里瑪鼎上所編萬年曆發  
米五千石賑阿濟格部之貧者海都都勒幹屬戶內附  
敕所在給衣糧丙子定百官致仕資格甲申詔飭海道

漕運萬戶府京師以久旱民多疾疫帝曰此皆朕之責也赤子何罪明日大雪以嘉定州德化縣民災發粟賑之



元史卷二十四

元史卷二十四考證

仁宗紀大德十一年三月丙辰 按丙辰原刻作丙寅

考成宗紀是年正月丙辰朔則丙寅當在三月初旬

以外考哈喇哈斯傳云三月朔列牘請署后決以三

月三日御殿聽政明日迎仁宗入執阿固岱等就誅

是仁宗之入在三月二日不應為丙寅明矣今據改

至大四年正月壬辰 按壬辰原刻作壬子考是年正

月癸酉朔上文丙戌為十四日下文甲午為二十二

日中間不應有壬子今據天文志改

四年四月壬寅朔 按原刻脫朔字以前文庚寅為三月十八日計之則壬寅乃四月朔也今增

四年給雲南王羅丹部屬馬價鈔一萬二千錠 按原刻脫鈔字今據文義增

皇慶元年賜衛王鄂勒哲及其子金三百兩銀一千二百五十兩鈔三千五百錠 按衛王原刻作安王考諸王表鄂勒哲以大德九年封衛安王至大三年已

進衛王今據改





總校官編修臣吳紹潔